

华阴县志

第一函  
第九册

華陰縣志卷十一

人物 列女

晉

武元楊皇后諱豔字瓊芝宏農華陰人也父文宗見外戚傳母  
天水趙氏早卒后依舅來舅妻仁愛親乳養后遣他人乳其  
子及長又隨後母段氏依其家后少聰慧善書姿質美麗嫻  
於女工有善相者嘗相后當極貴文帝聞而爲世子聘焉甚  
被寵遇生毗陵悼王軌惠帝秦獻王東平陽新豐陽平公主  
武帝卽位立爲皇后有司奏漢故事皇后太子各食湯沐邑  
四十縣而帝以非古典不許后追懷舅氏之恩顯官趙俊納

俊兒虞女粲於後宮爲夫人帝以皇太子不堪奉大統密以  
語后后曰立嫡以長不以賢豈可動乎初賈充妻郭氏使賂  
后求以女爲太子妃及議太子婚帝欲娶衛瓘女然后盛稱  
賈后有淑德又密使太子太傅荀顛進言上乃聽之泰始中  
帝博選良家以充後宮先下書禁天下嫁娶使宦者乘使車  
給騶騎馳傳州郡召充選者使后揀擇后性妒惟取潔白長  
大其端正美麗者並不見留時下藩女有美色帝掩扇謂后  
曰下氏女佳后曰藩三世后族其女不可枉以卑位帝乃止  
司徒李胤鎮軍大將軍胡奮廷尉諸葛冲太僕臧權侍中馮  
蓀祕書郎左思及世族子女並充三夫人九嬪之列司冀亮

豫四州二千石將吏家補良人以下名家盛族子女多敗衣  
瘁貌以避之及后有疾見帝素幸胡夫人恐後立之慮太子  
不安臨終枕帝膝曰叔父駿女男胤有德色願陛下以備六  
宮因悲泣帝流泣許之泰始十年崩於光明殿絕于帝膝時  
年三十七詔曰皇后逮事先后常冀能始終永奉宗廟一旦  
殂隕痛悼傷懷每自以夙喪二親於家門之情特隆又有心  
欲改葬父祖以頃者務崇儉約初不有言近垂困說此意情  
亦慰之其使領前軍將軍駿等自克改葬之宣至時主者供  
給葬事賜謚母趙氏爲縣君以繼母段氏爲鄉君傳不云乎  
慎終追遠民德歸厚且使亡者有知尙或嘉之于是有司卜

吉寯窈有期乃命史臣作哀策敘懷

武悼楊皇后諱芷字季蘭小字男胤元后從妹父駿別有傳以咸甯二年立爲皇后婉孌有婦德美映椒房甚有寵生勃海殤王早薨遂無子太康九年后率內外命婦躬桑于西郊賜帛各有差太子妃賈后妒忌帝將廢之后言於帝曰賈公閭有勳社稷猶當數世宥之賈妃親是其女正復妒忌之間不足以一眚掩其大德后又數誠厲妃妃不知誠之助已因以致恨謂后構之於帝忿怨彌深及帝崩尊爲皇太后賈后凶悖忌后父執權遂誣駿爲亂使楚王瑋與東安王繇稱詔誅駿內外隔塞后題帛爲書射之城外曰救太傅者有賞賈后

因宣言太后同逆駿既死詔使後軍將軍荀悝送后于永寧宮特全后母高都君龐氏之命聽就后居止賈后諷羣公有司奏曰皇太后陰漸姦謀圖危社稷飛箭繫書要募將士同惡相濟自絕於天魯侯文姜春秋所許蓋以奉順祖宗任至公於天下陛下雖懷無已之情臣下不敢奉詔可宣勅王公于朝堂會議詔曰此大事更詳之有司又奏駿藉外戚之資居冢宰之任陛下既居諒闇委以重權至乃陰圖凶逆布樹私黨皇太后內爲唇齒叶同逆謀禍釁既彰背捍詔命阻兵負衆血刃宮省而復流書募衆以獎凶黨上背祖宗之靈下絕億兆之望昔文姜與亂春秋所貶呂宗叛戾高后降配宜

廢皇太后爲峻陽庶人中書監張華等以爲太后非得罪于先帝者也今黨惡所親爲不母于聖世宜依孝成趙皇后故事曰武帝皇后處之離宮以全貴終之恩尙書令下邳王晃等曰皇太后與駿潛謀欲危社稷不可復奉承宗廟配合先帝宜貶尊號廢諸金墉城于是有司奏請從晃等議廢太后爲庶人遣使者以太牢告于郊廟以奉承祖宗之命稱萬國之望至於諸所供奉可順聖務從豐厚詔不許有司又固請乃可之又奏楊駿造亂家屬應誅詔原其妻龐命以慰太后之心今太后廢爲庶人請以龐付廷尉行刑詔曰聽龐與庶人相隨有司希賈后旨固請乃從之龐臨刑太后抱持號叫

截髮稽顙上表詣賈后稱妾請全母命不見省初太后尙有侍御十餘人賈后奪之絕膳而崩時年三十四在位十五年賈后又信妖巫謂太后必訴冤先帝乃覆而殯之施諸厭劾符書藥物永嘉元年追復尊號別立廟神主不配武帝至成帝咸康七年下詔使內外詳議衛將軍虞潭議曰世祖武皇帝光有四海元皇后應乾作配元后既崩悼后繼作至楊駿肆逆禍延天母孝懷皇帝追復號諡豈不以鯀殛禹興義在不替者乎又太甯二年臣忝宗正帝譜泯棄罔所循按時博諮舊齒以定昭穆與故驃騎將軍華恆尙書荀崧侍中荀邃因舊譜參論撰次尊號之重一無改替今聖上孝思祇肅禋



祀詢及羣司將以恢定大禮臣輒思議伏見惠皇帝起居注羣臣議奏列駿作逆謀危社稷引魯之文姜漢之呂后臣竊以文姜雖莊公之母實爲父讐呂后寵樹私戚幾危劉氏按此二事異于今日昔漢章帝竇后殺和帝之母和帝卽位盡誅諸竇當時議者欲貶竇后及后之亡欲不以禮葬和帝以奉事十年義不可違臣子之道務從豐厚仁明之稱表于往代又見故尙書僕射裴頤議悼后故事稱繼母雖出追服無改是以孝懷皇帝尊崇號謚還葬峻陵此則母子道全而廢事蕩革也于時祭于宏訓之宮未入太廟蓋是事之未盡非義典也若以悼后復位爲宜則應配食世祖若以復之爲非

則譜謚宜闕未有位號居正而偏祠別室者也若以孝懷皇帝私隆母子之道特爲立廟者此苟崇私情有虧國典則國譜帝諱皆宜除棄匪特不得同祠于世祖之廟也會稽王昱中書監庾冰中書令何充尙書令諸葛恢尙書謝廣光祿勳留擢丹陽尹殷融護軍將軍馮懷散騎常侍鄧逸等咸從潭議由是太后配食武帝

晉書五行志溫縣人造書曰兩火沒地哀哉秋蘭歸彤街郵終爲人歎楊后被廢買后絕其膳八日而崩葬街郵亭北百姓哀之也

兩火武帝諱

蘭楊后字也

**周**

宣皇后楊氏名麗華隋文帝之長女也帝在東宮武帝爲帝納

后爲皇太子妃宣政元年閏六月立爲皇后帝後自稱天元  
皇帝號后爲天元皇后尋又立天皇后及左右皇后與后爲  
四皇后二年二月詔取象四星于是后及三皇后並加大焉  
册授后爲天元大皇后又立天中大皇后與后爲五皇后焉  
后性柔婉不妒忌四皇后及嬪御等咸愛而仰之帝後昏暴  
滋甚喜怒乖度嘗譴后欲加之罪后進止詳閑辭色不撓帝  
大怒遂賜后死逼令自引決后母獨孤氏聞之詣閣陳謝叩  
頭流血然後得免帝崩靜帝尊后爲皇太后居宏聖宮初宣  
帝不豫詔隋文帝入禁中侍疾及大漸劉昉鄭譯等因矯詔  
以隋文帝受遺輔政后初雖不預謀然以嗣主幼冲恐權在

他族不利於已聞昉譯已行此詔心甚悅之後知隋文有異圖意頗不平形于言色及行禪代憤惋愈甚隋文內甚愧之開皇初封后爲樂平公主後又議奪其志后誓不許乃止大業五年從煬帝幸張掖殂于河西年四十九煬帝還京兆有司備禮祔葬后於定陵

**隋**

文獻皇后獨孤氏諱伽羅河南雒陽人周大司馬衛公信之女也信見文帝有奇表故以后妻焉時年十四帝與后相得誓無異生之子后初亦柔順恭孝不失婦道后姊爲周明帝后長女爲周宣帝后貴戚之盛莫與爲比而后每謙卑自守世

以爲賢及周宣帝崩文帝居禁中總百揆后使李圓通謂文帝曰大事已然騎獸之勢必不得下勉之及帝受禪立爲皇后突厥嘗與中國交市有明珠一篋價直八百萬幽州總管陰壽白后市之后曰非我所須也當今戎狄屢寇將士疲勞未若以八百萬分賞有功者百寮聞而畢賀文帝甚寵憚之帝每臨朝后輒與上方輦而進至閣乃止使宦官伺帝政有所失隨則匡諫多所宏益候帝退朝而同返燕寢相顧欣然后早失二親常懷感慕見公卿有父母者每爲致禮焉有司奏以周禮百官之妻命於王后憲章在昔請依古制后曰以婦人與政或從此漸不可開其源也不許后每謂諸公主曰

周家公主類無婦德失禮於舅姑離薄人骨肉此不順事爾等當誡之大都督崔長仁后之中外兄弟也犯法當斬文帝以后之故欲免其罪后曰國家之事焉可顧私長仁竟坐死后異母弟陀以貓鬼巫蠱呪詛於后坐當死后三日不食爲之請命曰陀若蠹政害民者妾不敢言今坐爲妾身敢請其命陀於是減死一等后每與上言及政事往往意合宮中稱爲二聖后頗仁愛每聞大理決囚未嘗不流涕然性尤妬忌後宮莫敢進御尉遲迴女孫有美色先在宮中上於仁壽宮見而悅之因得幸后伺帝聽朝陰殺之帝由是大怒單騎從苑中出不由徑路入山谷間二十餘里高頰楊素等追及扣

馬苦諫帝太息曰吾貴爲天子而不得自由高頰曰陛下豈以一婦人而輕天下帝意少解駐馬良久中夜方始還宮后候帝於閣內及帝至流涕拜謝頰素等和解之帝置酒極歡后自此意頗衰折初后以高頰是父之家客甚見親禮至是聞頰謂已爲一婦人因以銜恨又以頰夫人死其妾生男益不善之漸加譖毀帝亦每事唯后言是用后見諸王及朝士有妾孕者必勸帝斥之時皇太子多內寵妃元氏暴薨后意太子愛妾雲氏害之由是諷帝黜高頰竟廢太子立晉王廣皆后之謀也仁壽二年八月甲子月暈四重己巳太白犯軒轅其夜后崩於永安宮時年五十九葬於太陵其後宣華夫

人陳氏容華夫人蔡氏俱有寵上頗惑之由是發疾及危篤謂侍者曰使皇后在吾不及此云

煬帝愍皇后蕭氏梁明帝歸之女也江南風俗二月生子者不舉后以二月生由是季父岌收養之未幾岌夫妻俱死轉養舅氏張軻家軻甚貧窶后躬親勞苦煬帝爲晉王時文帝爲選妃於梁卜諸女皆不吉歸乃迎后於舅氏令使者占之曰吉遂策爲妃后性婉順有智識好學解屬文頗知占候文帝大善之煬帝甚寵敬焉及帝嗣位立爲皇后帝每遊幸未嘗不隨從時后見帝失德心知不可不敢措言因爲述志賦以自寄其詞曰承積善之餘慶備箕箒於皇庭恐修名之不立



將負累於先靈迺夙夜而匪懈實寅懼於元冥雖自彊而不  
息亮愚矇之所滯思竭節於天衢才追心而弗逮實庸薄之  
多幸荷隆寵之嘉惠賴天高而地厚屬王道之升平均二儀  
之覆載與日月而齊明迺春生而夏長等品物而同榮願立  
志於恭儉私自兢於誠盈孰有念於知足苟無希於濫名惟  
至德之宏深情不邇於聲色感懷舊之餘恩求故劍於宸極  
叨不世之殊盼謬非才而奉職何寵祿之踰分撫胷襟而未  
識雖沐浴於恩光內慚惶而累息顧微躬之寡昧思令淑之  
良難實不遑於啓處將何情而自安若臨深而履薄心戰慄  
其如寒夫居高而必危慮處滿而防溢知恣夸之非道乃攝

唐

元宗貴嬪楊氏太尉知慶女元宗在東宮嬪以景雲初入宮爲良媛時太平公主忌帝而宮中左右持兩端織悉必聞媛方娠帝不自安密語侍讀張說曰用事者不欲吾多子奈何命說挾劑以入帝於曲室自煑之夢若有介而戈者環鼎三而三煑盡覆以告說說曰天命也乃止生男是爲肅宗元宗卽位爲貴殯初肅宗生卜云不宜養乃命王皇后舉之后無子撫肅宗如所生後又生寧親公主乃薨肅宗卽位至德二載太上皇自蜀詔有司具儀尊稱遂上册諡爲元獻皇后寶應末祔泰陵

按法詭節惑太子妃墓誌良媛生忠王卜者曰  
不宜養命妃舉字此云命王皇后舉之互異

**明**

思宗貴妃田氏西安人世行估居揚州父宏遇以奢自豪生妃  
而殲妍揚故多銜女習伎能宏遇娶之爲後妻教妃鼓琴天  
啓中選人信王邸王入嗣册禮妃未幾進皇貴妃妃敏慧善  
伺上意指上寵之嘗鼓琴上問師何人以後母對上不信妃  
恐上疑已踰月以他節請召母入乘間令鼓琴上前一再行  
上悅賜勞之自是母出入嘗注宮門籍不復禁妃善粧籠每  
以新飾變宮中儀法燕見却首服別作副髮藏髮間宮衣用  
紗縠雜綴諸翦繡而隱以他色如罨畫然上冠舊綴鴉青石

與珠相間妃去珠易以珠胎而嵌鴉青于其中望之有光焉  
宮中燈多縷金匝雖炬麗而炬不外達妃乃刻燈扇每當  
炬處去一方以疏綃幕之炬影左右徹觀者稱快嘗厭宮闈  
過高迴崇杠大牖所居不適意乃就廊房爲低檻曲楯蔽以  
敞榻雜採揚州諸什器床篔供設其中又以永巷接宮門御  
益往來必行風日中妃令爲蔭薄夾棕葉覆之凡用心工巧  
作類此雖變易舊制然較便故上亦聽之且嘗去小黃門之  
舁已輿者而易以宮婢上稱其有禮特妃頗干預每見上輒  
爲外家乞思澤而宏遇以妃故官左都督交遊結納極園林  
聲伎之盛朝士附勢者爭相造請每以外情輸宮禁上頗厭

之先是宮中凡令節宮人以插戴相餉偶貴妃宮宮婢戴新  
樣花他宮皆無有中宮宮婢齊向上叩頭乞賜上使中官出  
採辦越數百里不能得上以問妃妃曰此象生花也出嘉興  
有吳吏部家人攜來京而妾家買之上不悅至是妃以搆后  
故上怏怏本欲斥妃以洩后忿會上入不食妃叩之上曰吾  
欲破格用朝臣而朝臣孰可用者妃曰聞霍維華好及上出  
而薦維華者適至上大怒摘妃冠斥妃啓祥宮令省愆妃生  
皇三子永王及皇五子皇五子遂薨于啟祥宮既而用后言  
召妃復妃禮如故而妃遂病當皇五子將薨時兩河催餉者  
日三至武清侯孽子李國正訐其兄國瑞藏禁物自莊房土

地外精鏤環寶累萬萬上召見國瑞諭以輸餉國瑞辭不能  
上怒責之既而國瑞死有憑皇五子爲言者曰吾九蓮菩薩  
也上待吾家薄吾逝將去此皇五子慧隨我行先是神廟時  
孝事慈聖皇太后有言慈聖爲九蓮化身宮中遂以慈聖像  
裝九蓮菩薩祀之武清侯卽慈聖家也至是宮中禱九蓮徹  
三晝夜而皇五子終不起上悔嘆息曰竟以貧故殺此兒謚  
曰悼靈王而武清竟免後上至妃宮思悼靈值寇亂甚河南  
諸王多被害愴念骨肉間傷懷呼宮婢能言宮中往事者使  
言之因言福王之國時神廟鍾愛王出宮門召還者且三約  
三歲當入朝上詘指曰三歲一千日但恐皇父不待耳時上

年高王皇后稀進見富大漸時猶顧視貴妃啾啾以河南爲  
念今何如矣上唏噓而起其後妃遷承乾宮十五年七月薨  
謚恭淑端慧靜懷皇貴妃葬天壽山

以上  
后妃

隋

蘭陵公主字阿五隋文帝第五女也美姿儀性婉順好讀書帝  
於諸女中特所鍾愛初嫁儀同王奉孝奉孝卒適河東柳述  
時年十八諸姊並驕踞主獨折節遵婦道事舅姑甚謹遇疾  
必親奉湯藥文帝聞之大悅由是述漸見寵遇初晉王廣欲  
以主配其妃弟蕭場文帝初許之後遂適述晉王因不悅及  
述用事彌惡之文帝崩述徙嶺表煬帝令主與述離絕將改

嫁之公主以死自誓不復朝謁上表請免主號與述同徙帝大怒曰天下豈無男子欲與述同徙耶主曰先帝以妾適柳家今其有罪妾當從坐不願陛下屈法申恩帝不從主憂憤而卒時年三十二臨終上表曰昔共姜自誓著美前詩息媯不言傳芳往哲妾雖負罪竊慕古人生既不得從夫死乞葬於柳氏帝覽之愈怒竟不哭乃葬主於洪瀆川資送甚薄朝野傷之

隋書

南陽公主者煬帝長女也美風儀有志節造次必以禮年十四嫁於許國公宇文述子士及以謹肅聞述病且卒主親調飲食手自奉上世以此稱之及宇文化及弑逆王隨至聊城而



化及爲竇建德所敗士及自濟北西歸大唐時隋代衣冠並  
在其所建德引見之莫不惶懼失常唯主神色自若建德與  
語主自陳國破家亡不能報怨雪恥淚下盈襟聲辭不輟情  
理切至建德及觀聽者莫不爲之動容隕涕皆肅然敬異焉  
及建德誅化及時主有一子名禪師年且十歲建德遣武賁  
郎將于士澄謂主曰字文化及躬行弑逆人神所不容今將  
族滅其宗公主之子法當從坐若不能割愛亦聽留之主泣  
曰武賁既是隋室貴臣此事何須見問建德竟殺之主尋請  
建德削髮爲尼及建德敗將歸西京復與士及遇於東都主  
不與相見士及就之立於戶外請復爲夫妻主拒之曰我與

君讐家今恨不能手刃君者但謀逆日察君不預知耳因與告絕訶令速去士及固請主怒曰必就死可相見也士及知不可屈乃拜辭而去

隋書

襄城王恪妃者循州刺史柳旦女也妃姿儀端麗年十餘以良家子合法相聘以爲妃未幾而恪被廢妃修婦道事之愈敬煬帝嗣位恪復徙邊帝令使者殺之於道恪與辭訣妃曰若王死妾誓不獨生於是相對慟哭恪死棺斂訖妃謂使者曰妾誓與楊氏同穴若身死之後得不別埋君之惠也遂撫棺號慟自經而卒見者莫不爲之涕流

隋書

華陽王楷妃者黃門侍郎龍涸縣公河南元巖女也巖明敏有

器幹煬帝嗣位坐與柳述連事除名徙嶺南後會赦還長安  
有人譖巖逃歸收而殺之妃有姿色性婉順初以選爲妃未  
幾而楷被幽廢妃事楷愈謹每見楷有憂懼之色輒陳義理  
以慰諭之楷甚敬焉及江都之亂楷遇害宇文化及以妃賜  
其黨元武達初以宗族之禮置之別舍後因醉而逼之妃自  
誓不屈武達怒撻之百餘辭色彌厲因取髀自毀其面血淚  
交下武達釋之妃謂其徒曰我不能早死致命將見侵辱我  
之罪也因不食而卒

隋書

楊愔妻高氏東魏大丞相渤海王高歡女封太原公主卽孝靜  
后也東魏滅楊愔尙之愔自尙主後恆衣紫羅袍金縷大帶

遇李庶頗以爲恥謂曰我此衣服都是內裁既見子將不能

無愧

魏書

楊師道妻李氏唐高祖第五女也封桂陽公主初嫁隴西趙慈  
景慈景死改封長寧更嫁師道聰悟有思工爲詩豪侈自肆  
晚稍折節以壽薨

楊思敬妻李氏唐高祖第十一女封安平公主

楊仁輅妻李氏唐太宗第十三女封晉安公主下嫁韋思安又  
嫁仁輅

楊慎交妻李氏唐中宗第四女韋庶人所生封長寧公主內倚  
母愛寵傾一朝賂謁紛紜營宅西京右屬都城左頰大道作

三重樓以馮觀築山浚池帝及后數臨幸置酒賦詩韋氏敗  
斥慎交絳州別駕主偕往開元十六年慎交死更嫁蘇彥伯  
楊徽妻李氏唐元宗第二十女封平昌公主初嫁溫西華元和  
時改封宋國又嫁楊徽

楊敷妻李氏唐元宗第二十一女始封興信公主徙封甯親下  
嫁張瓘又嫁斐穎改封齊國公主未嫁敷薨

按此卽元獻皇  
后所生之女也

楊洄妻李氏唐元宗第二十二女封咸宜公主興元時又嫁於  
崔嵩洄慎交子也

楊說妻李氏唐元宗第十三女始封建平公主下嫁豆盧建改

封衛國又嫁說薨說涓子也

以上公主

**漢**

楊夫人者漢太史司馬遷女丞相安平侯楊敞之妻也漢昭帝崩昌邑王賀卽帝位淫亂大將軍霍光與車騎將軍張安世謀欲廢賀更立帝議已定使大司農田延年報敞敞驚懼不知所言汗出浹背徒曰唯唯而已延年出更衣夫人遽從東廂謂敞曰此國之大事今天將軍議已定使九卿來報君侯君侯不疾應與大將軍同心猶與無決先事誅矣延年從更衣還敞夫人與延年參語許諾請奉大將軍教令遂共廢昌邑王立宣帝居月餘敞薨益封三千五百戶君子謂敞夫人

可謂知事之機者矣

漢書楊敞傳

桓氏楊賜夫人關內侯太常榮之孫而太常郁之女也桓氏世以經學傳授楊震受業於郁賜復師事郁子焉而爲郁之壻焉郁子鸞卒夫人歸寧赴哀將至止于傳舍整飾從者而後入鸞子嚴字文林尤修志介心非之及夫人勞問終無所言號哭而已賜遣吏奉祀因縣發取祀具亦拒不受後每至京師未嘗舍宿楊氏

後漢書

袁氏汝陽人司空袁逢女太尉楊彪之妻也子修有俊才爲丞

相曹操主簿操忌修且以袁術之甥慮爲後患遂因事殺之命其妻卞氏者遺夫人書并送衣絹車牛夫人受而亦答之

以書稱彪袁氏章樵曰稱袁氏而加夫名于上執謙以自卑也

**元魏**

王氏樂浪人文明太后之外姑宏農簡公楊懿妻生子播等八人皆貴德業顯於當時孫曾世繼紱冕爲榮

蓋氏建遠將軍楊禎妻以子忠貴追封北海郡君隋文帝之祖母也

**隋**

王氏楊慶妻王世充兄之女慶以河間王子爲郇王守滎陽陷於世充世充僭號妻之用爲管州刺史太宗攻洛陽慶謀與



歸唐王氏謝曰鄭以我奉箕箒者綴公之心今負恩背義自  
爲身謀可若何至長安則公家婢耳願送我還東都慶不聽  
王謂左右曰唐勝則鄭滅鄭安則吾夫死若是生何益乃飲

藥死

唐書

**唐**

長孫氏楊遺直妻博通典籍遺直爲濠州錄事參軍客死姑蘇  
遺子發假收嚴氏守貧訓子親授諸經四子皆登進士歷顯  
官而收至執政

**元**

李氏王懋德妻年十八歸王太守讓子懋德未逾年而夫卒人

以少艾爭媒之氏剪髮誓不改醮育猶子爲子元季兵亂攜  
避山中平定乃歸至明洪武十六年有司以閭旌表其門方  
孝孺以文贊之

舊志

**明**

嚴氏生員遶達妻夫卒矢志從葬親鄰或勸以二孤方幼氏曰  
吾死以明志不知其他遂自縊而死

賈志

陳氏郭允休妻幼習女訓歸于郭孝事翁姑允休亡撫棺號泣  
誓以身殉家人防護甚嚴乘間飲毒死

賈志

徐氏陳宗大妻宗大充潼關驛卒歿時徐年十九守志至八十

七終撫按官旌焉

舊志

張氏柴良妻生子未逾月而良死繼姑思毒嬰兒以爲所生占產乃潛移他所避之復受聘逼嫁氏引刀截髮逃之母家女紅自給時方二十三耳守貞四十六年而終撫按官表其閭

舊志

黃氏楊佶妾佶爲淇縣訓導卒氏矢節不二嘉靖中撫按官旌

其門 賈志

閻氏陳虞恭繼妻夫亡氏年二十一歲甘貧守節撫前妻子過

於已出苦守四十四年督學道高給匾以旌 賈志

李氏楊自卑妻夫卒氏年二十翁老子幼家計蕭然茹苦堅持

孝事繼母撫育前孤訓子力學以孝廉成名垂五十年如一

日也學使者按部屢旌其門

舊志

張氏生員屈用妻旌表

屈氏譜

張氏生員楊訓妻訓以孝義聞於時比卒張出服飾治大槨示必殉也戚黨苦諭乃止而終身垢面足不及中庭督學使者

匾之曰貞

舊志

趙氏生員陳星斗妻幼通列女孝經諸傳十六適星斗三十而孀矢志守節撫孤入庠未幾子與子婦俱亡更歷兵荒撫二孤孫成立年八十卒

賈志

馬氏廩生王之祚繼室性柔靜善事舅姑祚歿哀悲不自勝飲食俱廢踰月而卒其侍姬楊氏亦自縊以殉時之祚父母已

老別無子息媵妾張氏年方少艾矢志不二竭力事養備極

艱苦守節歷四十餘年 賈志

鮑氏王之寵妻孝事舅姑少寡撫孤成人垂四十餘年艱苦備

嘗邑人稱之 賈志

井氏王之翰妻年二十守節孝姑撫子鄉里稱焉 賈志以上列婦

楊氏霍霞妻

查霍霞與妻楊氏俱河南靈寶人霞攜妻商于高陵病死楊氏爲避兵計寓居華陰卒仍歸葬陝州與華無涉也邑節孝祠內列有木主不知所由姑附存於此

**原**

楊氏呂纂妻右僕射楊桓之女也咸寧五年立爲皇后楊氏美

豔有義烈纂爲超所刺楊氏命禁兵討之殿中皆其黨與莫有應者將軍魏益多入斬纂首楊氏泣曰人已死如土石無所復知何忍復殘其形骸乎益多罵之楊氏與婢數人殯纂於城西將出宮超恐其挾珍寶出外使人搜索之楊氏厲聲責曰爾兄弟不能和睦手刃相屠我旦夕死人用金寶何爲超慚而退又問楊氏玉璽所在楊氏怒曰已毀之矣超見其有色欲納之謂其父桓曰后若自殺禍及卿宗桓以言告楊氏楊氏曰大人本賣女與氏以圖富貴一之已甚其可復使女辱於二氏乎桓不能強遂自殺諡曰穆后

十六國春秋

隋

永豐公主秦王俊長女也年十三遭父憂哀慕盡禮免喪遂絕

酒肉每忌日輒流涕不食

北史

**唐**

王氏在祿而母亡繼母鞠愛父征遼歿繼母又卒氏年十五乃

舉二母柩而立父象招魂以葬廬墓左永徽中詔楊氏婦在

隋時父歿遼西能招魂克葬至祖父母塋隧親扶板築哀感

行路因賜物段并粟以闕表門後適楊紹宗

唐書

楊氏名容華盈川令楊炯侄女善屬文嘗為新粧詩好事者多

傳之詩曰宿

一作林

鳥驚眠罷房櫳乘曉

一作曙色

開鳳釵金作縷

鸞鏡玉為臺妝似臨池出人疑向月來自憐終不見

一作方未日

欲去復徘徊

朝野僉載

盆川聞而善曰吾家道韞也整麗精工齊

梁妙詣唐女子無能及者

堯山堂外紀

楊氏楊凝女三歲母隴西李氏卒遂依於外族五歲屬母忌日

飯僧仁祠就問其故保傅以告乃號泣不食每及是日必遑

遑涕慕抱終身之戚焉許嫁河東柳宗元克敦婦儀事姑備

敬養之道宗元母嘗曰自吾得新婦增一孝女矣年二十三

以疾逝

柳宗元楊氏墓誌

楊氏字德隣司農少卿揚敬之小女年十三以六韻詩題奉慈

寺自稱關西孔子二十七代孫其警句云日月金輪動梅檀

碧樹秋塔分鴻雁翅鐘掛鳳凰樓事因見勅贈衣

西陽雜俎



侯氏其先太原孟縣人世爲河東大姓曾祖元祖嵩當五代之  
亂以武勇聞劉氏偏據日錫土於烏河川以控寇盜亡其爵  
位父道濟始以儒學中科第爲潤州丹徒縣令贈尙書比部  
員外郎母刁氏封福昌縣君氏行第二幼而聰悟過人女功  
之事無所不能好讀書史博知古今父愛之造於子時以政  
事問之所言雅合其意常歎曰恨汝非男子七八歲時教以  
古詩曰女人不夜出夜出秉明燭自是日暮則不出房閣母  
素有風厥之疾多夜作不知人者久之氏涕泣扶持常連夕  
不寢弟可世稱名儒才智甚高常自謂不如氏也年十九歸

河南程珦官至大中大夫累封永年縣開國伯氏得封上  
谷郡君子顯學者稱明道先生頤稱伊川先生當時爲洛學  
之宗也

**明**

屈氏名淑都御史屈直之仲女也生而聰慧十餘歲父課諸兒  
讀經史淑刺繡其旁竊聽背誦通曉義意於是博覽羣書并  
爛吟咏歸朝邑韓邦靖汝慶汝慶髫年以神童名弱冠舉進  
士與氏稱雙璧詩文倡和如良友焉汝慶官參政早卒氏後  
十四年而歿無子有女曰異痛其父母繼亡父集旣梓而母  
詩不傳以書貽武功修撰康海之女乞海爲母詩序其詞酸

楚有願藉皮爲楮削骨代穎以傳母集之語海感而爲之序  
王良姐屠戶王讓之女肌體胖合盍後夫家疑其腹大謂有娠  
出歸母家訟之官良姐云妾屠家女穀食少肉食多是以腹  
大官吏游移不決良姐忿然曰此事易白遂引刀剖腹肝腸  
墮地猶對衆自明言畢而死天啟二年旌表

楊氏通洛里民楊雄女年十六許字潼關人郭恆恆客遊湖南  
久不歸父議改盟女不可斷髮自守家有巖壁鑿穴居之垂  
索以通飲食者二十六年恆歸氏年四十三矣乃成禮攬鏡  
自照笑曰世有白髮新婦耶副使張翰爲作貞女傳

舊志

張氏張祚昌女年及笄逆闖八關劫女挾之馬上忿罵不已躍

下者數四賊怒欲殺之女卽引頸受刃判屍數段而死遠近

悲歎

以上列女

國朝

孟氏貞偉鉉妻適貞不四年而偉鉉死年纔二十餘已無所生  
前室遺子女三皆幼伯氏以其少艾欲更嫁之氏不肯以撫  
孤自任食貧茹戚者垂四十餘年子賡諱得成立爲邑庠廩  
膳生員有司旌其門曰貞節

馬氏監生楊中涵妻

雷氏楊中漢妻

附王宏撰楊

氏雙節婦傳

光祿楊公之死于戰也歷五年所而子廕生中

涵以疾卒中涵妻馬氏同州馬公嗣煜之女也時年二十有四而無子哭不食欲以殉姑李恭人喻曰我且晚間就木之人也女忍舍我我寧先馬氏乃強起父母者憐之欲迎以歸馬氏泣曰有姑在此身奚歸于是既葬中涵以勤儉治家事李恭人益謹撫叔中渙如子中渙長而爲之娶妻篤妯娌之好焉崇禎十六年賊破潼關扶老攜幼避人山躬薪水以供饘粥迄返而李恭人病侍湯藥晝夜不離側及卒拮据治喪事葬祭以禮期不負其夫之爲子者蓋幼承名父之訓受書知大義故備極荼苦而卒甘之如飴恆曰庶無遺吾母辱中渙卒妻雷氏感之誓不更也雷氏同縣文學雷君大震女歸

中漢二載而中漢卒雷氏年方十有七生遺腹子曰宗時經  
賊亂家窘甚旣除服或以少艾諷之雷氏悽然曰我有母之  
範在况藐茲孤相依爲命楊氏祖宗鑑之矣更雪涕佐馬氏  
事李恭人勤紡績以補不足恭人卒不及見宗之娶宗旣娶  
不幸又早死蓋未亡人撫心忍痛所望以承楊氏之祧者至  
此而斬矣馬氏年七十以疾卒今獨雷氏存耳康熙二十五  
年 詔訪民間節孝於是有司以聞奉 旨給銀六十兩建  
防表之稱雙節云

崔氏楊宏泰妻年二十三泰死子甫三齡舅老瘠地僅四弓復  
塌於河吏日守門追賦族黨憐其貧苦以再醮諷氏曰吾更

嫁不如死遂以績紡爲事漸有餘力舅歿喪具無缺且供子  
讀書至長孫 爲太學生年七十一而終苦節四十六年  
題旌

史氏張必仲妻年二十餘仲死親老子幼家且貧氏事舅姑曲  
盡其歡及歿棺斂如禮以針指爲修脯延師訓子讀書守節  
四十餘年題旌

張氏袁瑛妻瑛死氏年二十守志撫孤頰歷饑饉辟績自給七  
十而終

張氏生員章際慶妻夫死氏年十九悲痛不勝執刀自刎家人  
急救之得免守節三十餘年

曹氏陳國起妻年十八生子方四閱月而國起死矢志勵節孝妻翁姑養葬如禮教子步雲成立獲列邑庠

晁氏趙建侯妻夫死二子幼穉守義不渝鞠教辛勤長子振櫛讀書爲邑庠生食餼有士行次子振翼力田贍家兄弟既娶猶時同被臥人稱之曰趙家被氏初撫叔祖母之孤兒爲之成室生子後其兒死櫛兄弟恐負母志復撫其孤如一家人櫛又收養從叔祖所遺子女皆晁之訓也

司氏王國佐妻國佐死氏年二十餘舅姑相繼而歿諸子俱幼紡織經營督家人各勤其業婺居四十六年持家嚴毅迄老不衰云



章氏張星妻夫亡年二十守節五十二年乾隆七年 旌

姚氏諸生陳宏祚繼妻夫亡年二十三薄田數畝衣食不足嚴寒深夜紡績不倦遇歲饑掃疾藜度日課子成立養前婦之病女過於所懷守節三十年卒邑令爲撰墓志乾隆八年

旌

李氏王國治妻夫亡年二十二守節四十三年乾隆八年 旌

嚴氏呂士烈妻夫亡年二十四守節三十九年乾隆十一年 旌

郭氏楊昂妻夫亡年二十五守節三十二年乾隆十二年 旌

郝氏屈超妻夫亡年十九守節三十八年乾隆十二年 旌

苗氏任應敬妻夫亡年十八守節五十三年乾隆十四年 旌

李氏馮璣妻夫亡年二十一守節三十一年乾隆十四年 旌

張氏邢議妻夫亡年二十守節七十五年乾隆十五年 旌

高氏張鳳翽妻夫亡年二十守節五十五年乾隆十五年 旌

許氏曹士毅妻夫亡年二十七歲守節四十二年乾隆十五年

旌

王氏宋之英妻夫亡年二十五守節四十八年乾隆十五年

旌

史氏馮貽慶妻夫亡年二十八守節二十四年乾隆十五年

旌

李氏田穎妻夫亡年二十守節三十五年乾隆十八年 旌

陳氏耿定成妻夫亡年十七守節三十六年乾隆二十年 旌

石氏曹會士妻夫亡年二十一守節六十二年乾隆二十年

旌

宋氏張翼辰妻夫亡年二十五守節四十年乾隆二十五年

旌

邊氏田英妻夫亡年十八守節四十一年乾隆二十六年 旌

陳氏楊毓卿妻夫亡年二十五守節四十八年乾隆二十九年

旌

張氏孫文炳妻夫亡年十七守節三十八年乾隆二十九年

旌

李氏武必煥妻年二十二必煥病死遺二女一子遺腹生牽裾  
在抱者呱呱不絕氏愴然矢誓孀守撫育男婚女嫁皆苦辛  
經營年五十六卒有司以請乾隆二十二年 旌

陳氏蘇芝妻夫亡年二十守節六十二年乾隆二十九年 旌

竇氏王其政妻夫亡年十八守節五十五年乾隆二十九年  
旌

孟氏郭銳妻夫亡年二十四守節五十二年乾隆二十九年  
旌

楊氏仇文獻妻夫亡年二十守節三十一年乾隆三十三年

旌

宋氏張鵬飛妻十九歲而寡生子樹滋方三月餘奉親育孤甘  
貧苦守族惡有逼之改適者氏恚恨自縊得隣婦解救不死  
乃持刀劃面墨塗以毀其容矢志彌堅乾隆三十一年旌

師氏李鶴鳴妻明敏具理家才年二十三鶴鳴疾殞無子時祖

姑及姑皆衰病兩叔俱在童稚舉室恐其年少有他志對之

輒哭氏乃哀跪自矢老幼懽然氏運籌拊擋莫不協規翁姑年

踰九旬尙無恙兩叔成立得以列名膠庠皆氏功也守節已

四十六年乾隆三十八年旌

馮氏党乾生妻幼字乾生乾生因貧貿易江左家獨祖國臣年

幾八十母陳亦逾五旬俱患病無依氏父馮克恂命氏暫往服勞奉養時年才十四茹辛含酸者三年祖與姑相繼歿而乾生未歸氏貨其衣裙爲之殯葬畢封其門而回越歲乾生始至乃成禮僅兩月乾生復外出病死生遺腹子祿甫七月氏以党氏五世單丁矢志存孤教養辛勤遂至成立現年六十八歲寡守者五十年乾隆三十八年 旌

李氏馮彥妻夫亡年十九守節三十七年乾隆三十九年 旌  
屈氏楊效儒妻夫亡年二十一守節五十年乾隆三十九年 旌

王氏劉銳妻夫亡年二十守節五十七年乾隆四十一年 旌

賈氏史續曾妻夫卒氏年二十遺子尙未週歲翁姑恐不能終  
守見之輒泣氏知其意方欲自明適母家有以改醮之言試  
之者氏悲憤嗚咽時值製衣卽以剪刀刺額流血被面衆乃  
共信其堅孝親撫孤備歷艱辛卒教子淮爲邑庠士守節五  
十七年年七十七而卒卒之日刺痕猶在額也乾隆四十一  
年旌

張氏辛丙蓮妻夫亡年二十守節四十二年乾隆四十二年  
旌

徐氏王庭弑妻夫亡年二十一守節四十一年乾隆四十二年  
旌

趙氏楊輔世妻于歸三載而輔世卒遺一子氏年甫十九當輔世病革恐氏年少不能堅守視之而嘆氏會其意嚙指泣誓時翁姑俱逝事祖姑雷氏維謹雷氏壽九十六而終奉之如一日也撫孤九思卒能成立守節四十三年乾隆四十二年

旌

倪氏仇大勳妻夫亡年二十一守節四十年乾隆四十三年

旌

雷氏袁蘊妻夫亡年二十三守節三十八年乾隆四十三年

旌

蘇氏王時聘妻于歸二年時聘病氏侍疾於側時聘謂曰余無



子上有老親死後汝能送終乎氏諾之窺其未信卽取剪刀截其左耳以自誓時聘乃取姪爲嗣而卒時氏年二十一翁已患癱嗣子方在襁褓產業僅地一畝氏以女工易衣食上飼下哺備歷辛苦守節六十五年壽八十六而卒崇祀節孝

賈氏楊欽妻欽賈河于南襄城病死氏年二十七歲或有以改

醮餽者氏素性烈遽持刀刺額拒之子生甫三月一姑老病茹苦含辛孝慈畢備守節五十七年

孫氏楊順妻卽賈氏之媳年二十五順病垂危謂氏曰余死以老親孤兒託汝汝能守余且啣恩地下氏卽揪耳環納夫手以矢其志輪缺終身如割一子尙未及歲氏事老撫幼辛苦

備嘗守節五十四年

張氏楊立本妻卽孫氏之媳年二十而立本死子未週歲氏事兩世寡姑撫孤兒勤勞成疾嘔血幾斃姑憂不治氏慰之曰吾家三世皆男夭而女壽始天欲留以撫孤者姑無憂也延二年果痊守節四十九年楊氏三世孀貞乾隆四十五年俱蒙旌

李氏郝一唐繼室年二十二夫死矢志守節撫前室子及生孫四人皆獲成名年八十六以壽終乾隆四十七年旌

尹氏張聚深妻聚深癡駭氏諧和無嫌年二十三生四子而夫亡守志撫孤皆底成立歷五十四年乾隆四十七年旌

馮氏邴登雲妻二十四歲夫死矢志堅守姑老子幼貧乏不給  
有欲嫁之者氏悲號持剪刀刺面以示無他守節四十年乾  
隆四十九年旌

胡氏孫秉德妻十九而寡無子事繼姑以孝撫弱叔以仁叔生  
子立爲夫嗣劬勞備盡守節五十六年乾隆五十二年旌

師氏田期遠妻夫死時氏年二十子甫三歲家貧志堅撫孤成

立守節五十年乾隆五十三年

旌

以上節婦俱旌

張氏張乾正女字潼關馬氏子甯未娶甯歿氏年十五計至痛  
哭堅欲奔喪守貞父母不許氏焚奩自誓父母驚駭走告其  
翁姑翁來亦以未婚勸令改聘氏叩頭哀乞不已翁嘆曰果

如此吾兒死無憾矣乃以素車迎之成禮柩前終喪未嘗至  
母家也奉侍舅姑終身恪盡婦道卒年七十五歲 于甯墓  
以完其志人咸稱爲奇節 雍正八年 旌表 祀

于潼關節孝祠

雷氏雷寄舟妹被里人孫景仁者語言調戲遂投井死乾隆二  
十一年 旌

杜氏屈喇嘛兒妻未歸屈門有張驚教兒調姦不從羞忿投井  
乾隆三十八年 旌

陳氏除煥霖女被張希文調戲氏羞忿遂自縊死乾隆二十九

年 旌

以上列  
女俱旌

石氏生員柴啓泰妻年二十六歲夫死事親撫孤歷艱辛者五十四年年七十九而終邑侯黎給匾旌之

徐氏張舉妻年二十五夫死生遺腹子家貧不能舉火有逼之改醮者氏以死誓卒撫子成立守節四十三年

郭氏生員蘇永泰妻年二十夫死守志不移歷五十五年以節終

王宏撰壽蘇節母

郭儒人詩二首

昔載存宏事於今一再傳年華雪髻冷風

節冰心賢天賞應方大人倫始不捐濡毫思頌德願上南山  
篇 朝廷方勵俗奇節自稱揚况有期頤壽將爲閭里光露  
承仙掌曉藕薦玉泉香此日頻開口綵衣戲正長

黎氏趙士杰妻年二十五喪夫娠而未生氏默祝曰天祚趙氏  
其生男乎已而果然辛勤鞠教者四十三年年六十八以節  
壽終

王氏生員楊晨妻淑婉慤嫻於婦道年三十一夫亡孀守事  
親撫孤孝慈備至協和妯娌壺政修明徽音素著內外稱賢  
壽六十六終

楊氏衛繩武妻十八歲歸繩武數月夫故父母謂其年少以改  
適意示之氏泣曰兒家世守清白願從一而終由是孝事舅  
姑撫姪爲嗣六十餘年未嘗輕出隣里罕識其面邑侯薛旌  
之以匾曰玉質冰心

甯氏李鉅妻年二十一歲夫死無子矢志自守夫堂伯子生甫  
周歲失恃氏撫之曰此可以衍李氏之緒家貧以女工爲活  
後伯子成立生子隨育之以爲夫嗣守節已四十一年

段氏劉自振妻十八歲夫死無嗣氏堅志持節後夫兄生子世  
德氏極意撫養教之讀書爲邑庠生世德長子法亦入庠次  
子浩登賢書遂爲氏承重孫焉

鮑氏楊秉仁妻年十六于歸越兩歲而秉仁死一子未幾亦亡  
時翁已六十八歲矣氏慮楊氏絕嗣勸翁再娶翁七十餘果  
舉一子翁卒繼姑隨歿氏歷艱辛撫育備至卒致楊氏有後  
里人頌之

郝氏劉仰崙妻崙死遺一子氏年尙少家貧以手工所獲撫孤  
父郝某者欲奪其志趨氏歸寧計強嫁之氏知卽奔回痛哭  
俟子不在側自縊于房中夫族憐其守貞而死買棺以葬邑  
孝廉張宗江爲之傳

雷氏蘇佩玫妻年二十六夫死無子取姪爲嗣氏盡心撫育迨  
娶妻生子方兩歲而婦亡氏撫孫教養成立鄉里高其節欲  
上于邑侯請旌氏却之曰此分內事旌非余意也守貞歷四  
十五年而卒

王氏周承姬妻年十七適承姬越歲生一子承姬出賈湖北家  
貧姑老氏供奉惟勤姑喜媼妬之乃與氏分爨未幾姑歿



承姬亦死於外計至氏引其子哭曰夫將行持此呱呱者泣而畀我我死子必死子死是負夫泣之之意也伯叔謂氏年少可獲厚利多方逼奪而志不移飢餓幾不能支其母兄恚之曰既不再嫁又不能餬口不如死氏泣曰夫死千里外寄骸他鄉欲活此孤覓取枯骨了我一生事死固有時也破屋爲兩叔所毀乃依夫族老孀張氏以居日拾風落柿顆蓄以爲食見者憐之子年十九氏呼而前撫其背仰天大哭曰兒已壯忍棄父骨於不問耶爲言父賈之處子遂赴湖得承姬瘞所啓負骸骨以歸氏迎而慟旣葬乃絕食其子泣懇百計不可解卽亦絕食氏曰余事畢矣死其時也爾從余死使爾

父墓前無紙錢灰無異埋魂他鄉余不忍爾父作餒鬼也族  
戚競勸之勉復食俾其子爲匠氏以績紡有餘貲爲子娶婦  
年六十三卒其貞苦于生者蓋四十三載

李氏馮瑁繼室前妻劉生二子而死娶氏閱兩年瑁病亡氏甫  
十九歲撫二子不辭貧苦母兄李翰問其終能完節否氏云  
我命孤孀改嫁固非婦道且安知不又如斯耶願勿復言長  
子不桐年十六娶妻生子未幾桐亦殞氏痛其父子少亡姑  
媳雙寡悲恚遂成瘋疾久之稍痊年七十有九而終

楊氏馮樹勛妻樹勛死氏年二十一歲姑已衰老一子甫生八  
月耳奉姑撫孤克盡其道六十餘親族欲公籲請表氏沮之

曰人皆夫婦偕老而我獨少寡應是前生罪過未消若再邀恩榮是又積今世孽也堅持不允

杜氏庠生蘇自振妻年二十三夫死痛夫無嗣取姪爲繼守貧撫養年八十餘卒

田氏劉天賜繼妻年十四歸天賜卽能孝事翁姑越四年夫死三日而生一子家道艱窘天賜弟欲嫁之氏哀泣不從甘貧忍痛事親育嬰一身經計守節七十四年壽九十三而終

孫氏張爾輝妻年二十一夫死一子僅週歲親老家貧勤織紡以供朝夕守貞教子歷五十九年壽八十而終邑候簡廷佐以冰心筠節旌其門

安氏楊萬春繼妻十七歲歸楊一載而夫亡撫前妻子如已出  
或有言改適者氏云人言有子萬事足我有子而不撫養成  
人再嫁何爲組紉經營年七十一而終

王氏馮克造妻克造髮禿舌結性復癡愚略知世故而已翁姑  
恐其憎嫌不諧而氏伉儷安然三年而克造歿氏取姪爲子  
撫育守貞或欲劫而嫁之氏以死誓孝事翁姑經營勤儉家  
道漸裕氏之力也

章氏張吉慶妻十六于歸六年而夫死生遺腹子氏孝養兩世  
翁姑劬育孤兒無怠色持家有力妯娌皆稟命而行卒年七  
十二歲

陳氏侯百里妻年二十三而寡子甫一歲矢志不移姑病鬻妝以供湯藥姑卒翁贅于外遺氏自度了無難色子長娶妻生子未晬而媳死氏已年五十貧不能覓乳姑以已乳慰之乳忽生汁孫賴以生鄉里奇之以爲侯氏一線未絕者氏之孀德所致也

劉氏增廣生郭文翰妻年十六于歸文翰越四載夫亡矢志守節時翁姑已逝又無所出取姪孫汝翼爲嗣方歲餘撫育辛勤五歲卽命就外傅紡績以供修脯汝翼力學登賢書揀銓知縣人謂貞德之報孀居四十五年而卒邑令學博咸給匾表之

張氏嚴楷妻年十八于歸六載夫亡守孀四十八年而卒邑令  
楊成械匾其門曰苦節慈心

孫氏王智德妻嫁兩年夫死氏年十八遺子僅一歲兩世翁姑  
在堂伯卒妻病四子俱幼叔尙未娶家累且貧皆謂氏不能  
安氏乃矢志不移侍老撫幼以紡績供衣食寒暑靡間者四  
十餘年鄉隣姻戚莫不感嘆

郭氏王文綱妻十九歲而寡守節三十二年孝事翁姑撫教二  
子體乾可楨俱列邑庠

吳氏生員王文紱妻夫死時二十五歲孀居三十餘年撫子履  
元爲邑庠生

李氏王文紘妻十七歲夫亡嫻於婦道守節五十二年子亮采  
邑庠生孫鸞聲登賢書司鐸肅州

李氏生員王文經側室二十六歲文經死氏孀守五十年而終  
王氏一室妯娌共敦貞孀康熙五十九年蒙督學使逢給匾  
曰一門四節

陳氏郝祐妻幼失怙恃志性不恆十八歸于郝越七日祐遂外  
出不返家無翁姑僅一孀母爲依未幾孀亦死形單影隻四  
壁蕭然以紡績度活人有憐而餽以粟麥者必酬以女工否  
則堅却不受恂謹如處子常數月不出中門卽母家亦輕不  
歸貞潔自守終身不移年八十三而卒鄉隣族黨共立貞珉

于葬所邑學教諭張景泓爲撰文訓導江得符詩以贊之

江得符詩

我行華山畿豐碑樹道傍借問三尺墳中有孤鴛鴦在

昔陳氏妹苦節洵殊常合昏甫七日夫婿遊遠方去去無還

期男兒輕故鄉婦人從一終况君有姑嫜夜織供晨膳中廚

啜糟糠藁砧竟不歸紅顏鬢已霜姑歿誠何依卓然守禮防

族人憐高義立嗣繼蒸嘗自此里閨間賢名羣推揚八十不

出戶機聲鳴空房嗟哉易簣言禮義信莫忘我聞古貞姬封

帛手織將歸來解素髮大節名久彰再聞梁山崩杞妻哭顏

傷亦未知死訣白頭永相望峨峨蓮華峯石骨眞昂藏巾幗

有奇行鍾靈何其長作歌勒貞珉庶幾發幽光



任氏武克勤妻年三十六夫死無子翁姑以年少家貧恐難終  
守欲嫁之氏以死誓迨翁姑歿而伯叔析居氏甘貧自度蓬  
首垢面汲水拾薪歷艱苦者四十年鄉隣憫其節義于其卒  
葬共立石以表之

楊氏張可勤妻年二十四而可勤歿遺子天鵝方及歲翁年八  
十有三家僅瘠田七畝氏竭織紡之力以給老幼翁卒脫簪  
珥喪葬如禮孀居六十二年而歿里人稱之

彭氏耿香奎繼室十八而嫁二十一而寡前妻子普年八歲氏  
撫之如已出娶妻生三子而普卒遺媳蘇氏氏佐之撫育諸  
孫孀苦五十餘年邑候給匾以旌

張氏耿可傳妻年二十三可傳死慨然以節自勵貧無所依退居母家織紡自度者五十九年而卒

衛氏郭繼寶妻年十八歸于繼寶孝事翁姑二十五而夫亡無子甘貧守志撫姪有慶爲嗣延師訓課有慶及子逢原並別膠庠皆氏三十餘年教養所成邑侯給匾旌之

張氏生員張玉琦妻年二十二而寡舅姑衰老子方歲餘氏矢志終守仰事俯畜一身任之撫子維寧成名中鄉試副車篤節四十八年

李氏劉明照妻年二十九夫亡守節不二歷五十年而卒

王氏郭千室妻二十而寡親老子幼氏甘貧守貞守節四十年

邑侯武給匾以旌

任氏貞從新妻年十八夫死生遺腹子家貧親老志切堅貞守節四十五年邑侯常給匾以旌

張氏衛聯功繼妻年十八而夫死矢志自勵奉姑命以姪爲嗣守節五十九年

徐氏監生王宜軫妻宜軫客死於浙氏年二十八歲貧窘無依居女家者四十餘年守志以終

郭氏生員王驄妻驄死無子氏年二十五歲以姪爲嗣守節五十餘年

張氏貞錫槐妻夫死氏年二十一守節已歷四十四年

劉氏適曰士妻十三歲于歸不兩月而曰士死翁姑早逝以姪  
爲嗣孤子守孀歷六十八年

楊氏陳依仁妻年二十八夫死守節撫子者四十九年

龐氏孟起祥妻二十歲夫死生遺腹子守節歷五十八年事親  
撫孤孝慈兼之

邊氏孫光祖妻夫卒氏年二十九歲守節四十五年邑侯簡賜  
其匾曰冰心筠節

孫氏楊永祥妻年十八而夫死生遺腹子翁姑憐其少欲嫁之  
氏以死誓家貧孤苦克孝克慈守貞六十一年

張氏孫揚勳妻年二十九夫故守節者四十五年

張氏安棲先妻年二十一夫死無子願留以奉翁姑守節四十二年

李氏王時召妻年二十二夫死無子翁姑衰病氏子身奉侍無缺撫嗣子坤孫肇迹俱入邑庠守節六十四年紳士多贈以詩文表其貞懿

李氏趙天佑妻二十二夫死孀居六十五年年八十四終

梁氏孫克敬妻年二十二夫死堅貞自守以事翁姑克敬弟克知妻李氏亦寡妯娌共敦孀節計守貞七十年年九十二而終邑侯黃以貞德遐齡旌之

李氏孫克知妻年二十五夫死三子俱在童稚與嫂梁氏同志

矢貞事親撫幼甘苦共之教子崇德已入郡庠守節五十年而終邑侯黃榜其門曰貞惠聯香

李氏李世正妻二十五歲世正死翁病叔瘋氏奉侍醫藥不懈守節五十一年邑侯傅給匾旌焉

劉氏楊瑞茂妻夫亡氏年二十七歲貞白自砥虔事翁姑已歷三十七年學使童以節孝旌之

章氏張錫封妻二十二夫死守寡服勤以事翁姑姑有寒疾抱之煖者百餘日孤苦四十餘年學博陳以節孝旌其門

章氏張攝妻年二十二夫死居寡事姑矢志不奪守節五十二年

郝氏增廣生張步月妻素嫻壺道伉儷如賓步月以疾卒生二  
子氏教養成立長光第武舉次培元文庠生年六十三以節  
終

劉氏生員史述古妻述古力學能文以病死氏年二十二食貧  
守貞力作自給歷四十九年以節終學使楊旌其門

郭氏趙自貴繼妻年十八夫故矢志靡他前室子方五歲撫育  
成立至孫寅生中式武舉守志四十五年

木氏李承正妻十九歲夫殞無子悲痛欲殉翁姑以奉養諭之  
乃立叔承謙子廷傑爲嗣義方訓教遂入邑庠承謙妻死遺  
子女俱童氏撫育如所生年七十鄉里以其孀守五十年孝

慈兼著僉謀書錦稱鴈表之氏曰未亡人承先命而勉終之  
何以彰爲固辭不允邑學博張贈匾旌之

劉氏趙齊烈妻年二十二夫死遺子賓方兩歲家貧僅薄田數  
畝氏撙負力作茹苦撫孤迨賓長娶妻亦劉氏賓復早亡劉  
懷孕未產氏禱于神祈生男以永嗣續及生果男也氏與媳  
履艱共苦撫之成人氏守四十五年劉守三十一年均以節  
終鄉里立石以表其貞

屈氏石斐然妻年十九夫死子未滿歲守志撫孤歷五十四年  
以節終

李氏監生張士傑妻夫死年二十七歲親老家貧矢志守節越



五十年終

孫氏井一滿妻二十五歲夫死叔謀令改醮氏堅志不允叔毀其室以困之風雪不蔽氏安處無異言叔愧悔復爲補葺孀居五十六年年八十一以壽終

王氏張御聘妻年十九而夫死守志越三十六年以節終

杜氏馮理繼室年十九夫死以侄續祚爲嗣亦娶杜氏續祚死妻年十八姑媳並孀姑守五十三年媳守六十二年同以節終

王氏張金貴妻年十九夫與翁姑相繼而亡家無尺土以績紡所積始葬三柩一子弱不任事氏仍苦力撫養守節四十四

年

張氏適謀道妻十九歲夫死翁姑俱年踰七旬子甫歲餘氏堅  
白自矢不以家貧移志事老撫幼劬勞盡瘁壽七十九以節  
終教諭張旌曰節孝

衛氏花玉明妻于歸後翁姑及幼叔相繼而亡夫亦尋死氏年  
二十七歲一子童稚家貧或有勸其贅夫以養者氏勵色拒  
之曰此畜類也豈人所爲遂莫敢強辛勤度日守節四十五  
年

王氏吳曰殷妻年二十四夫死二子俱幼家又單寒氏茹苦撫  
育成人守節五十七年八十餘恭遇

覃恩賞卹

劉氏郭瑞龍妻年二十夫死遺子甫及歲甘貧茹苦撫孤成立  
守節三十二年

孫氏適必位妻二十四歲夫死以嬰姪爲嗣教養成人守節四  
十一年

王氏曹世德妻夫死氏年二十矢志堅貞事老撫幼不憚艱瘁  
守節四十四年

郝氏李克正妻十八歲于歸甫一年夫死生遺腹子孀姑喜其  
有嗣氏奉姑育孤織紉爲生守節四十六年

郭氏王璨妻璨死氏年二十一歲翁老而子甫兩歲氏立志貞

潔守節四十九年

閔氏劉大任妻年二十夫死氏無所出翁姑詢其意氏斷指自誓從一不移撫姪爲嗣守節五十六年儒學劉給匾旌焉

吳氏梅惠繼室二十二歲夫死姑老子幼矢志堅貞守節六十四年以壽終

趙氏張永泰繼室于歸一載而夫亡遺前妻子甫歲餘其父母欲嫁之泣曰張氏之祀在此兒此兒之命在我我再嫁此兒必不能生張氏絕祀矣堅貞不易嚼米汁麵餅以口代乳卒撫孤成立自二十歲孀苦年六十二卒守節四十二年

張氏王錫賢妻二十二歲夫死孀居三十三年以節終

汪氏王資魁妻年十九夫死翁亦衰老子甫一歲立志從一赤貧無度母家助麥數斗使侄賣餅以給迨翁侄相繼而亡孤苦零丁里隣爲之酸鼻苦守四十二年以節終縣令汪給匾旌其門

郭氏麻元魁妻二十一而孀遺子半歲弱姑嬰兒依氏一人迨撫子成立娶婦生子數日而媳亡又哺無乳之孫履堅不磨苦節四十一年而卒

李氏適曰兪妻十九歲夫死以族子爲嗣嗣子亡又取族孫繼之鞠育劬勞年八十五終守節六十六年

荀氏孫世德妻十九歲夫死孝養兩世翁舅撫侄以繼夫嗣守

節已三十四年

王氏李儉妻二十二歲夫死無子一孤姪甫二歲其母改適氏勵志事姑撫姪守節四十二年

田氏蘇觀曾妻年二十而寡無子隣婦諭其改嫁舉錐刺目以明其志孝事翁姑撫姪爲嗣守節四十一年而卒

种氏彭際春繼室十六歲于歸十八夫死無子以姪爲嗣守節已三十年

甯氏彭喜麟妻二十一歲夫死無子以姪爲嗣守節六十六年而歿

周氏監生張翠鵬妻夫死時年二十九歲守節四十年

蘇氏魏緒蘭妻夫死時年二十八歲理家教子成立守節五十八年而卒邑侯楊給匾旌其門焉

党氏石松生妻十九歸于歸越年夫死無子撫姪爲嗣不異所生家貧以女工孝事翁姑翁姑歿鬻釵珥以葬親族莫不稱其貞苦守節四十六年

劉氏石永敬妻夫死時年二十七歲守節四十七年

馮氏屈培粟妻二十四歲夫死守節五十年

王氏郝有智妻年二十一夫死甘貧撫孤守節已四十三年

王氏楊效四妻年二十夫死矢志從一守節六十二年年八十

一以壽終

趙氏郝秀妻年二十夫死子然一身甘貧勵志守節六十三年年八十二以壽終

周氏郝文錦繼室年二十二夫亡奉養翁姑貞操不移守節四十年而卒

王氏郝素義妻年二十三夫死姑老子幼家計蕭然氏茹苦紡織以博米薪守節五十八年年八十一以壽終

嚴氏監生賀騰蛟妻年十九騰蛟死生遺腹子氏孝養翁姑鞠育嬰兒成立守節三十二年而卒

屈氏郭振邦妻二十歲夫死守節三十九年

曹氏郭民祿妻二十四歲夫死守節四十年



柴氏楊立緒妻二十四歲夫死守節五十五年

劉氏杜善繼妻二十六歲夫死守節三十一年

李氏王義公妻年二十二夫死守節五十三年

張氏李邦秀妻十九歲夫死持志不二孝事兩世翁姑撫姪爲  
嗣守節三十四年

孫氏杜峻妻二十二夫死守貞事親歷五十年而卒

耿氏張祺妻二十四歲夫死遺子尙未及歲持志撫孤守節四  
十七年而卒

張氏張復聘繼室年二十七夫死前妻子尙幼氏子甫及歲孝  
事翁姑鞠育二孤守節五十年卒

孟氏徐自照妻年二十五夫死無子撫姪爲嗣孀居已三十七年學博贈匾以旌

史氏趙楷齡妻學博史國鈞之女也生于儒門嫻明理義楷齡以病死遺子汾尙童幼氏年二十一歲竭力撫教長爲授室王氏汾以家貧出賈又死于外熒熒姑媳婺守相依者迄今三十餘年矣先是楷齡歿氏悲夫力學未及成名賚志以歿長泣傷目繼以哭子遂至失明鄉里莫不歎其高節

李氏太學生張宗遠妻二十五歲宗遠疾歿氏婺居勵節無子以姪季生爲嗣守貞已五十年邑紳欲具呈請旌氏止之曰寡守婦人本分事耳曷以旌爲甚非吾願也乃已

張氏井好學妻年十六歸好學好學業儒然善病尪瘠日甚自揣不起氏常侍疾好學持

御製賜節婦詩爲之誦解以窺其意氏聽訖嗚咽而對曰我知之矣好學死氏年十八卽誓天自守好學尊屬某者無行人也屢欲奪其志冀獲利資氏嚴抗之某復給氏父迎歸遣嫁父果聽從行至中途悉如某言以勸氏知出某之計以義斥其父而竟自奔回遂與父家永絕矣居貧茹苦冰操不移鄉里共傳

張氏邑庠生張澄清妻年二十于歸越六年而寡翁姑久病遺子述曾方四歲無伯叔妯娌氏事親以孝撫孤以慈三十餘

年擗擋壺務秩秩有法時學使者卽今福建中丞楊公嗣曾  
嘉其節行贈賜匾曰堅貞式穀

衛氏張超聘妻年十七于歸夫婦隨翁孝廉問明之蓋屋教諭  
官二年夫死無子氏痛哭欲殉翁姑勉諭並俾婢防閑乃斷  
其一指曰本不圖生恐違翁姑意姑捨此苟免翁姑憐之以  
姪盪喜爲嗣撫之如已出守孀四十年矣

王氏監生王允敬妻年十八歸允敬氏賢明而氣體薄弱慮不  
能育勸允敬買妾蕭氏未幾氏乃生子而蕭無所出允敬病  
亡氏年二十四歲以蕭少艾欲嫁之蕭執不肯時翁姑俱逝  
于是兩人杜門自守撫孤相依子長訓誡綦嚴蕭已卒氏年

六十里人稱雙節云

燕氏生員周德茂妻年二十二夫死氏無所出前妻子甫五歲家僅薄田二畝氏辛勤紡織以撫孤兒四十餘年

王氏楊先甲妻二十二歲而寡家貧翁姑老而二子俱在童稚氏事老撫幼茹苦堅守已四十三年

陳氏楊志儉妻夫死氏年二十七歲抱子泣誓柩前靡有他志守節三十餘年

王氏監生楊景雲繼室嫻於壺政景雲病篤託以家計並前妻子女俱幼囑其善視氏泣諾之景雲歿氏年二十五治家撫幼克盡其力歷三十四年

趙氏郭于棟妻年十四而嫁十五夫卽死遺子僅數月翁姑憐其少寡欲嫁之氏剪髮自誓守節四十年

楊氏郭勳祖妻十九夫死矢志不移孝事翁姑守節四十一年  
安氏李繼武繼室年二十二夫死事姑克順撫前妻子如己出  
孀守四十餘年

郭氏庾振水妻十七歲夫死冰霜自矢守節已四十七年

苗氏適曰勳繼室夫死氏年二十前妻遺子方三歲雙瞽氏撫育成立孀居歷六十二年

吳氏郭文昭妻二十二歲夫死無子以姪爲嗣孝事翁姑守節  
歷三十七年

張氏貞汝雯妻年二十二夫死事翁姑生葬如禮以姪爲嗣守節歷三十九年

嚴氏孟致全妻致全卽起祥遺腹子也娶氏一年死氏年十八與孀姑龐氏相依亦生遺腹子姑媳撫之氏亦守節歷五十二年

張氏李士燮妻二十一而寡祖姑及翁姑俱在堂氏奉侍盡獲歡心守節三十七年

任氏董簡妻簡死氏年二十四歲無子以姪爲嗣守志三十三年

李氏孫廷鳳妻二十七歲夫死矢志靡他孀居五十三年邑侯

王學使者稽俱給匾以旌其節

党氏孫必達妻年二十夫死以節自矢奉親撫子孝慈克敦守貞已六十二年邑侯王額匾旌之

張氏党嚴妻年十九夫死親老子幼家貧不以飢寒移志守節三十五年

田氏李生祥妻年二十二而夫死子幼矢志終守時姑及伯叔兩姑皆繼娶者亦相繼而寡感氏之義同安貞靡他守節五十四年

貞氏賈驚夢妻二十一而夫死無子有欲奪其志者嚴辭拒之孝事翁姑及卒典衣以葬守節四十二年



薛氏高增益妻年十六于歸越歲夫亡堅于守節歷五十九年而終督學溫以茶飴松勁褒焉

高氏史國維妻歸二年而夫以病死氏年甫十八生遺腹子天根志潔操貞撫孤入庠守節三十六年

王氏曹世泰妻二十五夫死以節自矢貞守四十二年

常氏李元超妻年二十三夫死翁姑意其少寡不能終節氏斷髮自誓願以媳代子奉侍克勤守節四十二年

張氏李學義妻十九于歸甫一年而夫死遺腹生子誓無他志日以績紉自苦事親撫孤歷三十餘年

王氏史有枝妻二十歲夫死守志撫孤歷四十九年

梁氏曹隆妻夫故守節歷四十一年

石氏屈誠妻年二十三而夫死一子甫十月業僅薄田二畝矢志守貞攜子寄居母家者十年以地所出營息漸有蓄積乃歸而母子自度歷五十三年

貞氏張兆吉妻十六歲歸張夫因家貧貿易豫省氏年二十二夫死于外姑以思子成瘋氏盡心服事姑疾稍間諭以守節非易事勸之使嫁氏堅志不移念夫柩寄他鄉無力以歸適有內戚往其地者哭泣叩懇戚憐其義爲之歸櫬茹苦奉姑以老孀守四十年

穆氏郭惠妻年二十一而夫死撫侄爲嗣亦殤孤子一身針指

爲生守節三十七年

蘇氏花天顯繼室二十四歲夫亡無子以侄森爲嗣教以義方  
隸名太學貞守四十二年乾隆五十四年 旌

張氏劉延奇妻二十二夫死生子未週歲守志撫孤劬勞不易  
越五十餘年

吳氏崔君奈妻年二十夫死一子尙未及歲家復赤貧乳哺盡  
瘁苦志不移已越六十三年人稱貞壽

閔氏楊廣生妻十八子歸越歲夫死翁姑意其不能守氏剪髮  
毀面以見志奉侍不懈伯大生甫生子卽育爲嗣撫之成立  
其子逢泰早歲入庠守節歷四十五年

王氏石公舉妻二十八夫死遺腹生子氏奉親鞠子孀守三十  
九年

陳氏張玉智妻年十九玉智出外病故家貧翁姑衰老誓不再  
醮生事死葬悉出於織紡孀苦四十三年

顏氏王昌孟妻昌孟營生理歿於湖省氏年二十無子家貧翁  
姑衰病伯嫂俱殞孤姪尙稚氏一身仔承奉老眷弱悉賴女  
工爲資備歷艱苦者五十六年

郭氏張應龍妻夫死氏年二十三以從一自誓甘守清貧以伯  
之孫爲孫嗣守節三十八年

王氏監生張雲霞妻夫死氏年二十五明大義以節自勵孀居

四十年

孟氏花和妻年二十四夫死勵志全節恭奉姑嫜遺子含秀尙  
在襁抱撫育成立延師訓教遂入邑庠食廩餼孀守四十年  
督學使楊以茹蘗和丸旌焉乾隆五十四年 旌

楊氏張崇信妻年二十五夫死守貧勵節事親教子鄉里稱賢  
守節四十八年

雷氏陳其昌妻年二十二夫死姑已先亡遺有祖姑一子尙未  
滿歲俯仰無資氏以紡織博衣食者三十三年

李氏王自儉妻年二十三而夫死甘貧苦守歷五十五年

花氏楊殿鶴妻二十二歲夫死無子姑卒翁病家貧翁憐其年

少無依令改醮氏剪髮以明無他守節四十年

張氏適必興繼妻十九歲夫死青年矢志守節四十八年

張氏耿敬濟繼室十八而敬濟死翁姑早故前妻子尚幼家人  
意其少艾不能終守氏泣言曰願留身以成夫嗣守節三十

八年

張氏王承基妻年二十七夫死生遺腹子立志守貞上事孀姑  
下撫嬰兒雖日不再食而操履彌勵守節四十五年

貞氏楊重華妻夫死氏年二十二歲翁姑衰病子未盈歲家又  
貧薄氏矢志靡他孝慈并周守節四十二年

牛氏董毓賢妻年二十五夫死撫孤成立守節五十四年

屈氏雷爾春妻年二十六夫死親老子幼克殫劬勞守節四十

年

王氏張世法妻年二十四夫死翁姑憐其年少欲嫁之氏泣曰

兒詩書人家女稍知大義願從一而終事親撫孤守節三十

二年

石氏王成光妻二十五而夫死子幼守節三十年

程氏侯續宗妻年二十夫死遺腹生子立志堅守病姑在牀嬰

兒在抱備極艱辛守節四十八年

屈氏石執中妻二十而寡以姪為嗣守節五十五年

屈氏張明召妻年二十夫死以姪為嗣守節三十六年

王氏石宅中妻年二十四夫死守節三十七年

劉氏石左江妻夫死時年二十八歲守節三十六年

李氏魏士傑妻年十六于歸克修婦道夫卒貞志靡他奉親訓  
子壺德益昭守節三十七年

趙氏石永顯妻夫死時年二十九歲無子家貧獨老翁氏矢志  
以婦代子奉養翁年逾八旬臨終嘆曰孝婦勝于孝子也守  
節三十六年

劉氏郝崙妻二十三歲夫死善事翁姑撫孤世魁成立爲諸生  
守節四十年

楊氏郝克守妻年十九夫死青年矢志履艱不移守節四十年



田氏郝作舟妻子歸越兩歲而夫死時年十八矢志堅貞守節  
四十五年

屈氏郝爵字妻二十二歲夫死養老撫幼勵志不移守節五十  
一年

郝氏段平妻年二十二夫死無子家貧姑欲嫁之矢志不允守  
節四十一年

田氏趙綿妻二十二歲而夫死家貧無子熒熒隻身紡績度日  
堅貞不移歷六十八年現年九十無恙

李氏李國全妻國全出外病故姑老失明幼子在抱氏上事下  
怙守節三十八年

陳氏郭進省妻十九歲夫死守節五十九年

郭氏党禮貴妻十九歲夫死守節三十三年

潘氏陳之善妻二十歲夫死守節五十六年

屈氏郝乾元妻年二十四夫死翁姑俱逝子幼家貧父憐之欲

奪其志堅誓不移守節四十七年

石氏王承宗妻承崇賢子成都病故氏年二十一歲生遺腹子

茹苦撫孤守節三十八年

袁氏梁明古妻年二十二夫死守節五十一年

王氏蘇改妻年十九夫死堅志持節其母家以無子勸之改適

立拒之數年不歸母氏之門撫侄為嗣孀守已三十二年

趙氏張翥鵬妻二十八歲夫死無子以侄爲嗣孝事翁姑生葬  
如禮守節四十五年

張氏王克容妻年二十二夫死一子甫兩歲矢志不二事親鞠  
孤克盡孝慈子長授室郭氏生孫數月而子又夭亡與媳茹  
苦撫孫守節四十二年

董氏馮孝思妻年十九夫死無子以姪爲嗣守節已三十八年  
張氏楊丕賢妻二十三歲夫死堅志撫孤守節已六十一年

蘭氏張日鯤妻年二十四夫死事親撫孤守節已四十八年

屈氏李之鐸妻年二十二夫死無子以女工孝養翁姑守節已

四十四年

王氏常繼業妻十八歲于歸生子甫數月繼業貿易湖省客死  
時氏年二十歲守志持節事親撫孤待子成立遣移夫櫬歸  
與翁姑並葬鄉里稱賢守節已五十六年

花氏屈蟠妻夫死時年二十二一子甫兩歲養姑撫孤不憚艱  
瘁守節六十一年年八十四卒邑侯衛旌其門曰貞德上壽  
屈氏王必全妻年二十三夫死姑老子幼守節已五十五年

張氏任逢年妻二十二而寡事翁撫子守節已三十九年  
張氏王朝棟妻年二十八夫亡歷貧守志已四十六年

屈氏馮秀儒妻夫死年二十歲以姪爲嗣順事翁姑婦職克敦  
守節已四十五年

井氏張士珠妻年十九夫死矢志守貞奉親撫孤克敦婦道守節已四十二年

張氏劉和妻二十二而夫死遺子成壘成進俱在嬰孩家貧如洗棲止土窰之內茹荼守志艱苦備嘗而堅貞不移邑侯姚給匾旌其門閭迨成進成立娶妻牛氏亦年二十二而成進殞亡牛氏與孀姑共敦婆節邑侯陸再給匾旌之張氏七十二而卒牛氏五十八而卒里人稱雙節云

王氏嚴必修妻年十九夫死生遺腹子家計單寒以織紉度活卒能撫子成立七十五歲以節終邑侯薛旌其門曰淑貞

李氏李廉妻年十八適廉二十八廉死遺子宏佑甫三歲家徒

陋屋三間以績紡度日宏佑年十四爲娶族女爲室宏佑年二十三而殞子福勤亦甫三歲又生遺腹子福儉姑媳含辛茹苦守志不移姑八十四以壽終媳已七十八歲里人咸稱雙節

李氏李承教女幼字高遷堡張自順之子學養承教貧苦六歲童養於自順家學養年十五病歿承教憐女幼且未成婚與自順議欲迎歸另字自順亦允之女憤泣而出以義斥其父願終於張矢誓不回承教與自順察其志堅遂不之強由是奉事翁姑舉如婦禮然因此悒鬱成疾越兩年年十七而卒葬於學養墓側以全其志鄉里嘆息稱爲罕見

郭氏仇大用妻年二十四大用死一子甫兩歲堅貞自矢奉親

撫孤守志已三十四年

貞氏任懷誠妻十九歲夫死守節已五十四年

劉氏任增盛妻二十而寡守節已五十六年

郝氏李天壽妻年二十一夫死守節已四十二年

吳氏張佐禹妻年二十夫死守節四十年而卒

楊氏王邦現妻年十九夫死奉翁撫孤守志已閱六十七年現

年八十六歲

屈氏王丕德妻年十九夫死守節已四十三年

趙氏王士棟妻年十九夫死守志五十八年而卒

李氏張贊妻年二十夫亡矢志堅貞守節已六十八年

劉氏任德鰲妻年二十三夫死守節五十年而卒

王氏任增惠妻年二十一夫死子甫一歲矢志撫孤守節已五十八年

崔氏張景宣妻年二十一夫死奉姑撫孤甘貧不易守節五十二年而卒

蘇氏屈丕悅妻年二十一而寡夫臨終以孀姑嬰兒爲託未幾子亦殤氏矢志養姑撫亡姊子自慰守節五十年而卒

陳氏馬維寧妻年十九夫死子甫半歲養姑撫孤矢志不渝守節五十一年而終



崔氏鄭仰喬妻年二十三夫死奉養孀姑撫姪爲子已歷六十  
一載現年八十四歲人稱貞壽

吳氏增廣生員劉廷瑞妻年二十夫死無子氏本儒家女明義  
持節茹苦不渝單貧無依母家爲置地十四畝以資饋粥歷  
四十一年而卒

李氏王慎德妻年二十四而寡一子三歲守節撫育歷三十七  
年而卒鄉里製錦稱之

周氏李聯棕妻年二十四夫死守節歷五十一年而卒邑令薛  
給匾旌其門

屈氏田繼宗妻年二十三夫死守貧撫孤已歷三十六年

花氏王國佐妻年二十一夫死生遺腹子守志撫孤已歷三十五年

張氏陳爾安妻年十四于歸二十七而寡親老子幼矢志守節壺政嚴飭畢盡婦道孫敬勝得列邑庠氏之教也年八十七以貞壽終

王氏陳之訓妻卽張氏子婦也十八歲于歸二十七夫死事孀姑撫幼孤志節不渝年八十三亦以貞壽終

張氏陳可服妻十六歲于歸所生俱殤諄勸夫置妾生一子甫三歲夫死妾亦繼亡氏撫之如已出經理家務訓子成立已七十六歲

李氏石鎮邦妻十六歲于歸甫一年夫死撫姪爲嗣克守孀節  
已歷三十一年

鄭氏監生雷時應繼室年二十二孀居子聲宏妻楊氏亦年十  
九而寡姑媳俱節操堅貞鄭年八十二卒楊已七十七矣

馮氏李溢妻年十七夫死時值災歉與翁餬口豫省未幾翁歿  
氏乞食而歸撫姪爲嗣茹苦守節歷四十九年同嗣子赴豫  
扶翁柩歸葬鄉里稱之

張氏楊瑋文妻年二十三而寡遺子甫一歲氏甘貧守節已歷  
四十一年

遶氏楊嵩妻年十九嵩歿生遺腹子嵩父以其少艾慮不終節

時舉節孝事相慰氏喻其意嚙手指自誓孝慈並敦守節四十七年而卒

李氏王多文妻年二十一夫死遺子甫三歲守志撫孤年八十四以節終

王氏李名寶妻年二十八夫死一子尚幼茹苦撫孤成立卽李永和以孝著稱氏守節四十七年年七十五卒

張氏田知法妻年二十夫亡無子家貧甘心守志已歷三十三年

郭氏監生楊潔妻年二十喪夫遺子甫一歲事翁撫孤歷四十二年而卒

張氏貢生牛煜章繼室以體素孱弱或不能產育勸煜章娶二妾既而氏與二妾各生一子年二十五煜章病劇慮氏有他意氏乃咬指自誓以慰之夫亡撫二子與所生無稍異二妾亦安于室歷三十四年而卒人以爲賢

趙氏生員張彥聘妻年二十九喪夫奉姑撫孤刻志竭力教子毓清名列邑庠守節已三十一年

段氏張鵬翰妻年二十二喪夫一子又繼亡取姪爲嗣甘貧守志歷五十一年而卒

邊氏李見龍妻年二十一夫亡事姑撫嗣子家貧守貞歷四十九年而卒

嚴氏張立志妻嫁二年而喪夫翁姑以其年少無所出諭令改適氏泣對云再醮人所羞道且親老無他子將何所依願留身事公婆翁姑未諾會其父母親串來說之終日氏志不移衆莫肯已因給衆曰尊長言固大可聽容兒再思之明日當決矣及夜乃投繯而殞距夫死之日未踰三旬也

孟氏張宏祉妻年二十一夫死姑及七旬子僅半歲甘貧守志已歷四十八年

安氏李希賢妻年二十七夫死以姪爲嗣守志已歷五十三年  
楊氏蘇民訪妻年二十夫死子甫歲餘守志撫孤者三十五年  
陳氏花長泰妻年二十五夫死姑老子幼矢志養育守節已四

十五年

李氏劉鑑妻年二十三夫死遺子文貞僅八月氏矢志守節事親撫孤已歷四十六年

張氏捐貢生閔成章繼室年二十五夫亡翁姑衰殘守志孝養邑教諭張景泓給匾旌之

任氏郝克靖妻年二十二歲夫亡姑老子幼諸艱備嘗後以壽蒙

賜粟帛守節五十六年

韓氏蘇思義妻年十八于歸二十五歲夫亡無子撫姪爲嗣備歷艱辛守節三十八年

楊氏姚澤遠繼妻于歸年餘夫前歿妻遺子僅四歲翁姑恐其  
年少無堅志氏以死自誓事親盡禮教子有方守節已五十  
四年

劉氏石永年妻年十八于歸慈順精勤二十三歲夫死撫姪君  
召爲嗣視如己出鞠育訓教以姪美

她封武德郎氏終六十六歲守節四十四年諸姪與孫多所顧  
復如武德郎君臣太學生大璋從九君寬皆賴氏成立君用  
生數月父母俱亡氏以口代乳現捐從九職夫學生鳳棲兩  
歲失恃枯瘠幾不能生亦氏所撫育鳳翔鳳鳴曾孫士偉俱  
中式士英及元孫常泰俱入庠鳳臨弱冠登戊戌進士現任



廣東青崗汎守備士林榮施乾隆五十六年以君召一堂五世

欽賜善門延慶字五十七年又以君召逮事祖父躬育元孫欽賜七葉衍祥匾額推原所由咸以爲孀節之報焉

萬氏黃世庫妻年二十六夫亡其翁姑以子故幾廢飲食而呱呱者又不堪聞氏飲泣茹苦仰事俯畜婦以代子巖以行慈現年已七十一歲

屈氏馮清臣妻無子以夫弟清晏子爲嗣而清晏亦歿妻係氏年僅二十一歲家貧無依兩孀共誓撫孤存祀人稱雙節

曹氏任嗣斌妻年二十一歲夫歿子幼家寒甚氏善調處無不

摒擋就理及子廷福以服賈家頗饒足率多周恤乾隆五十七年其子謀所以壽氏者氏曰以所費濟貧乏其爲壽不已多乎我毋以賀爲也遂散粟二十餘石守節已四十七年

辛氏任廷楨妻年二十八夫亡子僅一週親族殊無可依氏艱以自持義以教子家頗裕子亦列成均焉今已六旬有奇

張氏李占魁妻夫死家貧氏矢志堅守耕績撫子然教之從不少假顏色子遂成立今已七十九歲知者皆以爲女丈夫

張氏馮世祿妻年十八于歸越一載世祿貿易豫省尋歿於外其翁出外亦歿夫弟尚在弱齡氏竭力周旋倩人扶襯歸葬家寒不能自給寄食父家父亦歿其叔勒嫁氏以死自誓訪

續奉姑現年六十二歲守節四十四年

李氏張翥妻年二十二歲于歸二十四歲夫亡前妻之子崇璘方數歲呱呱在抱子崇敬暮生氏性剛烈冰霜矢志孀守而終守節五十二年

許氏馮克生側室年十七生子明元甫四月而夫亡氏事正室張氏勤謹備至教子有方守節已五十餘年

氏段宏業妻年十八于歸二十二歲夫亡生子僅一週氏茹苦歷艱壽八十二歲而終

王氏康宜輝妻年十五于歸二十一歲夫亡翁姑隣其年少氏引刀刺臂以矢靡他後翁歿姑患癱症氏滌污侍養始終無

怠取堂姪錕爲嗣亦歿遣孫尙幼艱辛備嘗壽八十以節終

宮監

狄班朝 嘉靖時內監

趙文煥字明寰萬曆時充尙膳監疊進總理太監墓在縣東五里賜祭

田用正德時入宮歷侍武宗世宗垂六十年大學士許國稱其恪以奉公仁以惠物一時中外著望焉

劉進朝字振伯萬曆時尙衣監太監

田義用姪萬曆時司禮監掌文書房太監陞南都司禮監鎮守

渭川

王進萬歷時會極門接本太監

王慶萬歷時乾清宮近侍尙衣監太監

楊珥萬歷時乾清宮奏事牌子司禮監太監

張進萬歷時司禮監奉御

王宣

賁鶴

趙國祥

袁成

胡秉忠

劉祥

李如桂

駱蒙恩

郝用

郭宇

以上十人俱御馬監太監據嶽廟進香碑刻

楊登司禮監太監御用監管事

周朝萬歷時御用太監

屈祥萬歷時司禮監太監

田朝陽萬歷時秦藩典膳

郭元美字雙璧天啟時邑廩生年三十餘已有子因事自宮遂

入大內時闈璫干預外政資其文墨漸至提督兩廠總理內

官元美善自韜晦故思宗誅戮諸閹不及於禍歸而卒老于家

楊進朝天啟時司禮監太監

趙應化崇正間太監

黨吉祥字獻瑞號葵吾內府司御用監事

張彝憲莊烈帝朝司禮太監也崇正四年以彝憲有心計令鉤

校戶工二部出入爲之建署名曰戶工總理其權視外總督

內團營提督給事中宋可久馮元颺等十餘人論諫不納吏

部尙書閔洪學率朝臣具公疏爭帝曰苟羣臣殫心爲國朕

何事內臣衆莫敢對南京侍郎呂維祺疏責輔臣不能匡救

禮部侍郎李孫宸亦以召對力諫俱不聽彝憲遂按行兩部  
踞尙書上命郎中以下謁見工部侍郎高宏圖不爲下抗疏  
乞歸削籍去彝憲益驕縱故勒邊鎮軍器不發管盔甲主事  
孫肇興恐稽滯軍事因劾其誤國帝命回奏罪至遣戍主事  
金鉉周鑣皆以諫斥去工部尙書周士樸以不赴彝憲期被  
詰問罷去是時中璫勢復大振至八年始下詔盡撤監視總  
理明年命彝憲守備南京尋死

節明史



聖朝革命維新欽此諭旨奉天

高麗國王臣等領事官等奉天

命諭旨奉天領事官等奉天

諭旨奉天領事官等奉天

諭旨奉天領事官等奉天

諭旨奉天領事官等奉天

華陰縣志卷十二

宦績

呂飴甥

呂飴甥字子金晉陰大夫惠公及秦伯戰於韓原被獲舍諸靈臺晉侯使卻乞告瑕呂飴甥子金教之言曰朝國人而以君命賞且告之曰孤雖歸辱社稷矣其卜貳圉也衆皆哭晉於是乎作爰田呂甥曰君亡之不恤而羣臣是憂惠之至也將若君何衆曰何爲而可對曰征繕以輔孺子諸侯聞之喪君有君羣臣輯睦甲兵益多好我者勸惡我者懼庶有益乎衆說晉於是乎作州兵飴甥會秦伯盟於王城秦伯曰晉國和乎對曰不和小

人恥失其君而悼喪其親不憚征繕以立圍也曰必報讐寧事  
夷狄君子愛其君而知其罪不憚征繕以待秦命曰必報德有  
死無二以此不和秦伯曰國謂君何對曰小人感謂之不免君  
子恕以爲必歸小人曰我毒秦秦豈歸君君子曰我知罪矣秦  
必歸君貳而執之服而舍之德莫厚焉刑莫威焉服者懷德貳  
者畏刑此一役也秦可以霸納而不定廢而不立以德爲怨秦  
不其然秦伯曰是吾心也改館晉侯餽七牢焉晉侯歸

先讜

先讜巴郡胸忍人光和元年爲華陰令時宏農太守河南樊毅  
與讜謀修理西嶽廟祠設中外館並繕治齋堂功就刻石以誌

謹復以華下十里內居民供應祭祀齋禱之事悉按照租田口業征輸賦役煩重民不堪命乃上書太守曰縣當孔道加奉尊嶽一歲四祠養牲百日常常充肥用穀藁三十餘斛或有請雨齋禱役費兼倍每被詔書調發無差山高聽下恐近廟小民不堪役賦有饑寒之窘違宗神之敬乞差諸賦役

謂以遠近差次一縣賦役復

華下十里以內民租田口業

復者蠲除其賦役以擾之也口業即口算令民計口出錢歲百二十

為一算始於漢初

以寵神靈廣祈多福降中興之祚毅輒聽行之而上

其書狀於尚書以達於上

段煨

段煨武威人

魏志

仕至中郎將董卓遷天子西都長安使煨屯華

陰

漢書

煨在華陰特修農事

典略

及李傕郭汜等亂獻帝東歸車駕

至華陰煨已授寧輯將軍具服御及公卿以下資儲請帝幸其

營初煨與楊定有隙煨迎乘輿不敢下馬揖馬上侍中种輯素

與定親乃言曰段煨欲反帝曰煨屬來迎何謂反對曰迎不至

界拜不下馬其色變必有異心太尉楊彪等曰煨不反臣等敢

以死保車駕可幸其營定攻之十餘日不下煨猶奉給御膳廩

贍百官終無二意定與董承言曰郭汜今且將七百騎來入煨

營天子信之遂露次於道南

漢書並袁宏記

建安三年以討夷李傕功

授安南將軍封闕鄉侯

漢書

李義琰

李義琰隴西人貞觀中爲華陰縣尉縣忽失一人莫知所在其父兄疑讐家所害詣縣陳情義琰案之不能決夜中執燭委細窮問據案俛首不覺死人即至猶帶被傷之狀云某乙打殺置於某所井中公可早驗不然恐被移向他處不可尋覓義琰卽親往果如所陳而讐家始具款伏當時聞見者莫不驚歎

法苑珠林

按唐書義琰魏州昌樂人其先出自隴西及進士第補太原尉非華陰也同州府志列於名宦故錄之以俟考

張汝明 宋史本傳

張汝明字舜文廬陵人徙真州登進士第歷華陰主簿華陰修嶽廟費鉅財窘汝明嚴與爲期民德其不擾相與出力佐役如期而成他廟非典祀者則毀而懲其人滯州縣二十年未嘗干

進徽宗擢監察御史

何祥

本賈志

何祥字子修四川內江人以鄉舉署麻城教諭嘉靖間擢邑令邑地狹而途衝節使往來歲無虛日小民疲於供役里胥緣以滋弊祥洞察民瘼裁抑浮冗懲慝植良剔蠹裕民乙卯關中地震華山諸峪水北潑沃野祥冒暑衝泥疏渠築堰踰年工竣民大賴之學宮傾圮不蔽風日捐俸易材鳩工增構民不知費士獲肄業華州之南爲商洛子午道華陽川抵秦嶺中塗二十里屬華陰地使節經過供帳煩費檄請兩臺俾華州洛南代攝竟獲免役陞襄陽府同知

張後覺

舊志

明史

張後覺字志仁荏平人篤於良知之學心解躬行齊魯諸生成所宗仰嘉靖間以歲貢生授邑學訓導敦勉學者功用悉稟諸儒先持己廉潔餽無所受士之貧者且出俸周之會地震之變上官檄署縣令事辦理賙卹救災持傷覃布愷澤里社歡然偶爲教諭者所擲揄卽拂袖告歸士民泣送載道歸而山左提學副使鄒善爲建願學書院俾六郡之士師事焉稱曰鴻山先生

王九疇

王九疇字子範河南鄧州人由舉人萬厯間任邑令銳於爲政以邑城面對三峯卑小不足以收竦高之氣於雉堞上建華靈



畢萃之樓於中西則作鎮西樓與東附垣之尊經閣相維峙尤  
加意學校凡廟廡學齋潤色倍勝於昔設四知書院於泉店東  
山水佳處爲士子講學之所縣故無常平倉粃之貯河灘地籽  
粒課租以備賑卹兩華分界之地峪水爲患正德間郡守桑溥  
鑿三渠洩瀉水患頓息後漸淤塞而患移於縣境居民鬪訟不  
已九疇與華牧會勘力辯利害仍復故道兩地人民均感其德  
其他善政宜民今猶口碑不替

遲維城

遲維城字屏萬奉天廣寧人康熙十八年來任邑今年纔踰弱  
冠明健具幹濟才時值用兵四川羽檄紛馳旌甲交錯於路供

餉浩大閭里騷然維城經理整肅吏胥不能爲奸軍兵斂手而  
過二十二年奉調各路兵馬回陝十州縣供運車輛俱集三河  
口大風雪人畜凍餓有至斃者維城單騎赴關畫轉運策兵民  
兩便政暇輒加意文教以宋儒朱文公曾提舉雲臺觀卜於觀  
右立祠捐俸白金與江南顧炎武邑人王宏撰經營叛建並構  
立堂廡爲士子講學之所當時關中碩儒如李因篤輩皆形諸  
篇章稱道其美遺愛在人迄今鄉村耆叟追述良吏者莫不推  
爲第一云

李夔龍

李夔龍字虞臣潼關衛軍籍居華治之北郭里餘其先襲指揮

世職至夔龍由明經任邑教諭整飭學校加意作人每月立期  
集士子訓課備給饗殮經久不忘家固素封捐俸輸貲繕修文  
廟學宮殿廡門垣規製增新憫貧士之無力赴秋闈者爲置田  
十餘畝取租易銀積三歲所得以優資斧今猶相沿其嘉惠庠  
士類如此而捐穀百石貯於社倉爲歉歲賑卹助則又波及於  
里民也歷十年膺卓薦陞保昌知縣士庶感沐德教勒石以誌  
其績

簡廷佐

簡廷佐字治六號霞山湖南邵陽舉人康熙四十九年爲邑令  
潔已愛民聽斷明允地當孔道政務紛紜而以整暇理之裕如

也尤雅意作人遴邑中雋出之士課治舉子業限期試之拈毫評隲孜孜不倦學者感懷德教爲建生祠於縣治之東辭不受於是易爲講學齋舍而顏之曰仰華書院俾諸生肄業其中政餘卽登講席爲之指說文律由此人文振起相繼而登甲乙科者比比矣以卓薦行取主政因先所辦軍需累不能脫獲病而卒士庶哭之哀櫬歸有執紼數千里以送之者事詳仰華書院碑記

姚遠翹

姚遠翹字羽豐號素山浙江仁和人副貢生乾隆初由教諭陞任米脂縣知縣調邑令居官平易慈祥不博取赫赫名而實政

畢舉縣境濱邈河渭之田被水冲齧民失恆產凡諸賦徭無力  
如籍輸納攄詞呈訴遠詔勘視非虛據情申請具得邀

恩豁除邑城北垣兩樓久經傾圮勸勉紳庶募捐數千金重加  
繕築并修治東西門樓觀瞻爲之頓壯間以邑士無講學會藝  
之所於雲臺觀中剏立雲臺書院遴拔俊髦延師訓課置地五  
十餘畝取租以供館穀又以觀內朱徽國文公祠宇簡陋增建  
殿廡復置地數畝爲祭祀之資計費千金皆出自己貲偶以公  
事鐫級而去捐授兵馬指揮再陞淮運分司擢刑部郎中告歸  
猶惓惓於華陰富其在華時慨舊刊嶽誌穢蕪另爲訂修已編  
輯成帙意有未愜攜之而行二十餘年用宏取精始輸貲梓行

杭其睠念斯士益徵本懷云同官丞某者小有才慢士縱役而好攬瑣訟以弔時譽遠翹恆晒而婉諷之不聽某後擢他省知縣卒以不檢敗昔樂廣爲政無當時功譽然去後遺愛爲人所思姚令有焉

郭琰

郭琰字 沔縣人由拔貢生任邑學教諭華之學校久就頽靡琰至一意振刷德怨弗計也文廟祭器朽無所存琰製造几筵俎豆既備且良春秋陳奠潔齊秩如俾祭者誠敬之心油然而生於戟門外剏立東西兩坊以補舊制之缺觀瞻倍壯於昔矣整飭士習期諸彬彬雅當學使者按臨之時士子迎謁道左衣

冠儼然望者卽識爲郭先生之門人也莫不悅服其教雅有知人鑒如韓城大司馬王杰華州提學王士棻諸人時方爲博士弟子卽許以科第文章顯優加獎進而隣邑諸生亦均修北面之禮焉以卓異膺薦舉未幾丁憂去

隋系

文帝

文帝楊氏諱堅宏農華陰人也漢太尉震之裔父忠從周太祖起義關西魏恭帝賜姓普六茹氏位至柱國大司空封隋國公母呂氏以大統七年六月夜生帝於馮翊赤光照室紫氣充庭狀如樓閣色染人衣內外驚禁有尼來自河東謂呂曰此兒所

從來甚異不可於俗間處之乃割宅爲寺委尼撫養名帝曰那羅延呂氏嘗抱帝忽見頭上角出徧體鱗起大骸墮帝於地尼自外入曰已驚我兒致令晚得天下爲人龍顏額上有五柱入頂目光外射有文在手曰王長上短下沉深嚴重周世宗時累官右小宮伯封太興郡公世宗嘗遣善相者趙昭視之昭詭對曰不過作柱國耳旣而陰謂帝曰公當爲天下君必大誅殺而後定武帝卽位爲隋州刺史進大將軍襲爵隨國公聘長女爲皇太子妃益加禮重齊王憲言於武帝曰普六茹堅相貌非常臣每見之不覺自失恐非人下請早除之武帝曰此止可爲將耳內史王軌驟言於武帝曰皇太子非社稷主普六茹堅貌有



反相武帝不悅曰必天命有在將若之何宇文憲破齊任城王  
高潛於冀州除定州總管先是定州城西門久閉不行齊文宣  
帝時或請開之以便行路文宣不許曰當有聖人來啓之及帝  
至而開焉莫不驚異宣帝卽位以后父徵拜上柱國大司馬俄  
轉大前疑位望益隆宣帝頗以爲忌宣帝有四幸姬並爲皇后  
諸家爭寵數相毀譖宣帝每忿怒謂后曰必族滅爾家因召帝  
命左右曰若色動卽殺之帝至容色自若乃止靜帝受內禪進  
爵爲王建隋國未幾遂受周禪焉革命之後卽號曰隋去是爲  
隋從所封也在位二十四年以仁壽四年七月崩年六十四葬  
於太陵周世禁除二氏之教頗厲帝年七歲時尼謂帝曰佛法

將滅神明已西兒當大貴神來有日矣及帝踐祚推重梵典每以尼爲言尼死卽葬所居般若寺中改曰大興國爲起金浮屠命王邵作傳稱揚仍令天下舍利塔內各作尼像以報之也

### 煬帝

煬帝諱廣小字阿廢文帝第二子也少敏慧美姿儀文帝及獨孤后於諸子中特所鍾愛在周以文帝勳封雁門郡公文帝受禪立爲晉王好學善屬文沉深嚴重朝野屬望文帝密令善相者來和徧視諸子和曰晉王眉上雙骨隆起貴不可言於是陰爲奪宗之計尤自矯情飾行以釣虛名文帝嘗幸所居第見樂器絃多斷絕又有塵埃若不用者以爲不好聲伎善之開皇八

年大舉伐陳命爲行軍元帥陳平封府庫資財無所取天下稱  
賢及構廢太子勇遂爲皇太子當受冊文帝曰吾以大興宮成  
帝業令出舍大興縣其夜烈風大雪地震山崩民舍多壞壓死  
者百餘人仁壽四年七月文帝崩卽位於仁壽宮在位十四年  
以大業十四年三月右屯衛將軍宇文化及作亂遇弒於江都  
時年五十宮人撤牀簀爲棺以埋之化及廢後右禦衛將軍陳  
稜奉梓宮於成象殿葬吳公臺下發斂之始容貌若生衆咸異  
之迄唐平江南之後改葬雷塘

### 恭帝

恭帝諱侑元德太子之子也母曰韋妃性聰敏有氣度大業三

年立爲陳王後數載徙爲代王煬帝征遼東令於京師總留事  
十一年拜太原太守尋鎮京師唐師入長安尊煬帝爲太上皇  
奉帝纂業改元義寧明年遜位於唐唐以爲鄴國公武德二年  
崩時年十五

楊勇

庶人勇小字覲地伐文帝長子也周世以祖忠軍功封博平縣  
侯及文帝輔政立爲世子拜大將軍左司衛封長寧郡公出爲  
雒州總管東京小冢宰總統舊齊之地後徵還京師進位上柱  
國大司馬領內史御正諸禁衛皆屬焉文帝受禪立爲皇太子  
文帝嘗從容謂羣臣曰前世皇王溺於嬖幸廢立之所由生朕

傍無姬侍五子同母可謂眞兄弟也豈若前代多內寵孽子忿  
爭爲亡國之道邪勇頗好學解屬詞賦性寬仁和厚率意在情  
無矯飾之行嘗文飾蜀鏡文帝性節儉見而不說戒之曰自古  
帝王未有好奢侈而能久長者汝當以儉約爲先乃能奉承宗  
廟吾昔日衣服各留一物時復觀之以自警戒今賜汝以我所  
舊帶刀子一枚並菹醬一合汝昔作上士時常所食也若存記  
前事應知我心後經冬至百官朝勇勇張樂受賀文帝知之問  
朝臣曰近聞至節內外百官相率朝東宮是何禮也太常少卿  
辛亶對曰於東宮是賀不得言朝文帝曰改節稱賀正可三數  
十人逐情各去何因有司徵召一時普集太子法服設樂以待

之東宮如此殊乖禮制自此恩寵始衰漸生猜阻勇多內寵昭訓雲氏尤嬖幸其妃元氏無寵遇心疾二日而薨獨孤后意有他故深以詰責然昭訓自是遂專內政后彌不平頗求勇罪晉王廣知之陰有奪宗之計於其朝還日入辭獻后故泣而言曰臣性識愚下常守平生昆弟之意不知何罪失愛東宮恆蓄盛怒欲加屠陷每恐讒譖生於投杼鳩毒遇於杯勺是用勤憂積念懼履危亡后忿然曰覘地伐漸不可耐我爲伊索得元家女望隆基業竟不聞作夫妻專寵阿雲使有如許豚犬前新婦本無病痛忽爾暴亡遣人投藥致此天逝事已如是我亦不能窮治何因復於汝處發如此意我在尙爾我死後當魚肉汝乎每

思東宮竟無正嫡至尊千秋萬歲後遣汝等兄弟向阿雲兒前再拜問訊此是幾許大苦痛邪因悲不自勝決意欲廢矣晉王知后意移深結楊素兄弟與之協謀後數日素入侍宴微稱晉王孝悌恭儉有類至尊用揣后意后泣曰公言是也我兒大孝順新婦亦大可憐我使婢去常與之同寢共食豈若覘地伐共阿雲相對而坐終日酣宴昵近小人疑阻骨肉我所以益憐阿廢者常恐暗地殺之素既知意因盛言太子不才后遂遺素金使贊帝廢立勇頗知其謀憂懼計無所出聞新豐人王輔賢能占候召而問之輔賢曰白虹貫東宮門太白襲月皇太子廢退之象也以銅鐵五兵造諸厭勝又於後園內作庶人村屋宇卑

陋太子時於中寢息布衣艸褥冀以當之文帝知其不安在仁壽宮使楊素觀勇素至東宮偃息未入勇束帶待之故久不進以激怒勇勇銜之形於言色素還言勇怨望恐有他變願深防察文帝甚疑之后又遣人伺覘東宮纖芥事皆聞奏因加媒孽構成其罪晉王又令段達私賂東宮幸臣姬威令取太子消息密告楊素於是內外誼謗過失日聞段達脇姬威曰東宮罪過主上皆知之矣已奉密詔定當廢立君能告之則大富貴威遂許諾文帝惑於邪議積致疎忌車駕至自仁壽宮翌日御大興殿謂侍臣曰我新還京師應開懷歡飲不知何意翻悒然愁苦吏部尚書牛宏對曰由臣等不稱職故至尊憂勞文帝既數聞



讒譖疑朝臣具委故有斯問冀聞太子之愆宏爲此對大乖本旨於是作色謂東宮官屬曰仁壽宮去此不遠而令我每還京師嚴備仗衛如入敵國我爲患利不脫衣臥昨夜欲得近廁故在後房恐有警急移就前殿豈非爾輩欲壞我家國邪於是執唐令則等數人付所司訊鞠令楊素陳東宮事狀以告近臣帝曰此兒不堪承嗣久矣皇后恆勸我廢之我以布衣時所生復是長子望其漸改隱忍至今勇昔從南充州來語衛王云阿孃不與我一好婦女亦是可恨因指皇后侍兒曰是皆我物此言幾許異事其婦初亡卽以斗帳安餘老嫗新婦初亡我深疑使馬嗣明藥殺我曾責之便懟曰會殺元孝矩此欲害我而遷怒

耳初長甯誕育朕與皇后共抱養之自懷彼此連遣來索且雲  
定興女在外私合而生想此來由何必是其體循昔晉太子取  
屠家女其兒卽好屠割令儻非類便亂宗社劉金麟諂佞人也  
至呼定興作親家翁定興愚人受其此語勇嘗引曹妙達共定  
興女同讌妙達在外說云我今得勸妃酒直以其諸子偏庶畏  
人不服故逆縱之欲收天下之望耳我雖德慚堯舜終不以萬  
姓付不肖子也今欲廢之以安天下左衛大將軍元旻諫曰廢  
立大事天子無二言詔旨若行後悔無及讒言岡極惟陛下察  
之旻辭直強爭聲色俱厲帝不答是時姬威乃抗表告太子非  
法素又發洩東宮服翫似加調飾者悉陳之於庭以示文武羣

官爲太子之罪太史令袁充進曰臣觀天文皇太子當廢上曰  
元象久見矣羣臣無敢言者於是使人召勇勇見使者驚曰得  
無殺我邪文帝戎服陳兵御武德殿集百官立於東面諸親立  
於西面引勇及諸子列於殿庭命薛道衡宣廢勇之詔勇及其  
男女爲王公主者並廢爲庶人令薛道衡謂勇曰爾之罪惡人  
神所棄欲求不廢其可得耶勇再拜而言曰臣合尸之都市爲  
將來鑒誠幸蒙哀憐得全性命言畢泣下流襟旣而舞蹈而去  
左右莫不憫默時文林郎楊孝政上書諫曰皇太子爲小人所  
誤宜加訓誨不宜廢黜帝怒撻其胸勇自以廢非其罪頻欲見  
上面申冤屈而皇太子遏之不得聞奏勇於是升樹大呼聲聞

於上冀得引見素因奏言勇情志昏亂爲癩鬼所著不可復收  
帝以爲然卒不得見文帝寢疾於仁壽宮徵皇太子入侍醫藥  
而逼宣華事聞帝恚抵牀曰獨孤誤我乃呼柳述元巖曰召我  
兒述等將呼太子上曰勇也述巖出閣爲勅書爲楊素矯詔執  
繫獄俄而帝暴崩祕不發喪僞爲文帝敕書賜死遣楊約縊殺  
之追爲房陵王不爲立嗣勇有十男雲昭訓生儼裕筠高良娣  
生嶷恪王良媛生該詔成姬生嬰後宮生孝實孝範

### 楊儼

長寧王儼勇長子也雲昭訓所生誕乳之初以報高帝帝曰此  
卽皇太孫何乃生不得地雲定興奏曰天生龍種所以因雲而

出時人以爲敏對六歲封長寧郡王勇敗亦坐廢黜上表乞宿衛辭情哀切文帝覽而惻然楊素進曰伏願聖心同於螿手不宜復留意煬帝踐極儼常從行卒於道實鳩之也諸弟分徙嶺外仍勅所在皆殺焉

楊俊

秦王俊字阿祇文帝第三子也開皇元年立爲秦王二年春拜上柱國河南道行臺尙書令雒州刺史時年十二加右武衛大將軍領關東兵三年遷秦州總管隴右諸州盡隸焉俊仁恕慈愛重敬佛道請爲沙門上不許六年遷山南道行臺尙書令伐陳之役以爲山南道行軍元帥督三十總管水陸十餘萬屯漢

口爲上流節度陳將周羅暉苟法上等以勁兵數萬屯鸚鵡洲  
總管崔宏度請擊之俊慮殺傷不許羅暉亦相率而降於是遣  
使奉章詣闕垂泣謂使者曰謬當推轂愧無尺寸之功以此多  
慚耳上聞而善之授揚州總管四十四州諸軍事鎮廣陵歲  
餘轉并州總管二十四州諸軍事初頗有令聞文帝聞而大悅  
後漸奢侈違犯制度出錢求息民吏苦之上遣使按其事與相  
連坐者百餘人俊猶不悛於是盛治宮室窮極侈麗俊有巧思  
每親運斤斧工巧之器飾以珠玉爲妃作七寶罽籬重不可載  
以馬負之而行又爲水殿香塗粉壁玉砌金堦梁柱楣棟之間  
周以明鏡間以寶珠極瑩飾之美每與賓客妓女絃歌於上俊

頗好內妃崔氏性妬甚不平之遂於瓜中進毒俊由是遇疾徵  
還京師上以其奢縱免官以王就第左武衛將軍劉昇諫曰秦  
王非有他過但費官物營廨舍而已臣謂可容上曰法不可違  
昇固諫上忿然作色昇乃止楊素復進諫曰秦王之過不應至  
此願陛下詳之上曰我是五兒之父非兆人之父若如公意何  
不別制天子兒律以周公爲人尙誅管蔡我誠不及周公遠矣  
安能虧法乎卒不許俊疾篤未能起遣使奉表陳謝上謂其使  
曰我戮力關塞創茲大業作訓垂範庶臣下守之而不失汝爲  
吾兒而欲敗之不知何以責汝俊慚怖疾甚大都督皇甫統上  
表請復王官不許歲餘以疾篤復拜上柱國二十年六月薨於

秦邸上哭之數聲而已曰晉王前送一鹿我令作脯擬賜秦王  
今亡可置靈座之前心已許之不可虧信帝及后往視見大蜘蛛  
大蠶蟻從枕頭出求之不見窮之知妃所爲也俊所爲侈麗  
物悉命焚之勅送終之具務從儉約以爲後世法也王府僚佐  
請立碑上曰欲求名一卷史書足矣何用碑爲若子孫不能保  
家徒與人作鎮石耳妃崔氏以毒王之故下詔廢絕賜死於其  
家子浩湛

楊秀

越王秀文帝第四子也開皇元年立爲越王未幾徙封於蜀拜  
柱國益州刺史總管二十四州諸軍事二年進位上柱國西南



道行臺尚書令本官如故歲餘而罷十二年又爲內史令右領軍大將軍尋復出鎮於蜀秀有膽氣容貌瓌偉美鬚髯多武藝甚爲朝臣所憚文帝每謂文獻皇后曰秀必以惡終我在當無慮至兄弟必反矣兵部侍郎元衡使於蜀秀深結於衡以左右爲請衡旣還京師請益左右帝不許大將軍劉噲之討西爨也文帝令上開府楊武通將兵繼進秀使嬖人萬智先爲武通行軍司馬文帝以秀任非其人譴責之因謂羣臣曰壞我法者必在子孫譬如猛虎物不能害反爲毛間蟲所損食耳於是遂分所秀統秀漸奢僭車馬被服擬於天子及太子勇廢晉王廣爲皇太子秀甚不平皇太子恐秀終爲後變陰令楊素求其罪而

譖之仁壽二年徵還京師帝見不與語使使切讓之秀謝曰忝荷國恩出臨藩岳不能奉法罪當萬死皇太子及諸王流涕庭謝帝曰頃者秦王靡費財物我以父道訓之今秀蠹害生靈當以君道繩之於是付執法者開府慶整諫曰庶人勇既廢秦王已薨陛下兒子無多何至如是蜀王性甚耿介今被重責恐不自全帝大怒欲斷其舌因謂羣臣曰當斬秀於市以謝百姓乃令楊素等推治之太子陰作偶人書帝及漢王姓字縛手釘心令人埋之華山下令楊素發之又作檄文曰逆臣賊子專弄威柄陛下唯守虛器一無所知陳甲兵之盛云指期間罪置秀集中因以聞奏帝曰天下甯有是耶於是廢爲庶人幽之內侍省

不得與妻子相見令給獠婢二人驅使與相連坐者百餘人秀  
既幽逼憤懣不知所爲乃上表曰臣以多幸聯慶皇枝蒙天慈  
鞠養九歲榮貴唯知富樂未嘗憂懼輕恣愚心陷茲刑網負深  
山岳甘心九泉不謂天恩尙假餘漏至如今者方知愚心不可  
縱國法不可犯撫膺念咎自新莫及猶望分身竭命少答慈造  
但以靈祇不祐福祿消盡夫婦抱思不相勝致只恐長辭明世  
永歸泉壤伏願慈恩賜垂矜愍殘息未盡之間希與瓜子相見  
請賜一穴令骸骨有所瓜子卽其愛子也帝因下詔數其罪曰  
汝地居臣子情兼家國庸蜀要重委以鎮之汝乃干紀亂常懷  
惡樂禍睥睨二宮佇望災釁容納不逞結構異端我有不和汝

便覘候望我不起便有異心皇太子汝兄也次當建立汝假託妖言乃云不終其位妄稱鬼怪又道不得入官自言骨相非人臣德業堪承重器妄道青城出聖欲以己當之詐稱益州龍見託言吉兆重述木易之姓更修成都之宮妄說禾乃之名以當八千之運橫生京師妖異以證父兄之災妄造蜀地徵祥以符已身之籙汝豈不欲得國家惡也天下亂也輒造白玉之珽又爲白羽之箭文物服飾豈似有君鳩集左道符書厭鎮漢王於汝親則弟也乃畫其形像書其姓名縛手釘心枷鐐杻械仍去請西嶽華山慈父聖母神兵九億萬騎收楊諒魂神閉在華山下勿令散蕩我之於汝親則父也復云請西嶽華山慈父聖母

賜爲開化楊堅夫妻迴心歡喜又畫我形像縛手撮頭仍云請  
西嶽神兵收楊堅神魂如此形狀我今不知楊諒楊堅是汝何  
親也包藏凶慝圖謀不軌逆臣之迹也希父之災以爲身幸賊  
子之心也懷非分之望肆毒心於兄悖弟之行也嫉妬於弟無  
惡不爲無孔懷之情也違犯制度壞亂之極也多殺不辜豺狼  
之暴也剝削民庶酷虐之甚也唯求財貨市井之業也專事妖  
邪頑嚚之性也弗克負荷不材之器也凡此十者滅天理逆人  
倫汝皆爲之不祥之甚也欲免禍患長守富貴其可得乎後復  
聽與其子同處煬帝卽位禁錮如初字文化及之弑逆也欲立  
秀爲帝羣議不許於是害之并及諸子

楊諒

漢王諒字德章一名傑小字益錢文帝少子開皇元年立爲漢王十二年爲雍州牧加上柱國右衛大將軍歲餘轉左衛大將軍十七年出爲并州總管文帝幸溫湯而送之自山以東至海南拒河五十二州盡隸焉特許以便宜從事十八年起遼東之役以諒爲行軍元帥至遼水師遇疾疫不利而還十九年突厥犯塞諒禦之不克將帥多坐除解諒以其宿舊奏請留之文帝怒曰爾爲藩王惟當敬依朝命何得私論宿舊廢國家憲法耶諒自以所居天下精兵處見太子讒廢居常怏怏陰有異圖遂繕治器械招集私人殆將數萬王頗者梁將僧辯之子也僮

好奇略爲諒咨議參軍蕭摩訶者陳氏舊將二人俱不得志每鬱鬱思亂並爲諒所親善贊其陰謀及蜀王以罪廢諒愈不自安會文帝崩徵之不赴遂發兵反司馬皇甫誕流涕諫曰竊料大王兵資非京師之敵加以君臣位定逆順勢殊士馬雖精難以取勝一旦陷身叛逆欲爲布衣不可得也諒怒囚之王頗說諒曰王所部將吏家屬盡在關西若用此等卽宜長驅深入直據京都所謂疾雷不及掩耳若但欲割據舊齊之地宜任東人諒不能決乃兼用二策倡言楊素反將誅之兵曹裴文安說諒曰井陘以西是王掌握之內山東士馬亦爲我有宜悉發之分遣羸兵屯守要路仍令隨方略地率其精銳直入蒲津文安請

爲前鋒王以大軍繼後風行電擊頓於霸上京師震擾兵不暇  
集上下相疑羣情離駭我卽陳兵號令誰敢不從旬日之間事  
可定矣諒大悅於是遣諸將分道四出安爲柱國與紇單貴王  
暉等直詣京師未至蒲津百餘里諒忽改圖令紇單貴斷河橋  
守蒲州而召文安還文安至曰兵機詭速本欲出其不意王旣  
不行文安又退使彼計成大事去矣諒不對煬帝遣楊素率騎  
五千襲王暉紇單貴於蒲州破之於是率步騎四萬趣太原雨  
使趙子開守高壁楊素擊走之諒大懼拒素於蒿澤屬天大雨  
諒欲旋師王頗諫曰楊素懸軍深入士馬疲弊王以銳卒自將  
擊之其勢必克今望敵而退示人以怯阻戰士之心而益西軍



之氣願王必勿還諒不從退保并州楊素進兵圍之窮蹙請降  
百寮奏諒罪當死帝曰朕終鮮兄弟情不忍言欲屈法恕諒一  
死於是除名爲民絕其屬籍竟以幽死子顯因而禁錮字文化  
及弑逆之際遇害

### 楊昭

楊昭煬帝長子元德太子也初文帝以開皇三年四月庚午夢  
神自天而降云是天神將生降寤召納言蘇威告之及聞蕭妃  
在并州有娠迎置大興宮之客省明年正月戊辰而生文帝命  
養宮中三藏時於元武門弄石獅子文帝與文獻后至其所文  
帝適患腰痛舉手憑后昭因避去如此者再三文帝歎曰天生

長者誰復教乎由是大奇之文帝嘗謂曰當爲爾娶婦應聲而泣文帝問其故對曰漢王未婚時恆在至尊所一朝娶婦便則出外懼將遠離是以啼耳上嘆其有至性特鍾愛焉年十二立爲河南王仁壽初徙爲晉王拜內史令兼左衛大將軍轉雍州牧煬帝卽位便幸雒陽昭留守京師大業元年帝遣使者立爲皇太子昭有武力能引強弩性謙冲言色恂恂未嘗忿怒有深嫌可責者但云大不是所膳不許多品帷席極於儉素臣吏有老父母者必親問其安否歲時皆有惠賜其仁愛如此明年朝於雒陽後數月將還京師願得少留帝不許拜請無數體素肥因致勞疾帝令巫者視之云房陵王爲崇未幾而薨時年二十

三帝深追悼之昭妃慈州刺史博陵崔宏昇女後秦王妃以蟲  
毒獲譴昭奏曰惡逆者乃新婦之姑請離之乃娶滑國公京兆  
韋壽女爲妃有子三人韋妃生恭帝侑大劉良娣生燕王倓小  
劉良娣生越王侗

### 楊侗

楊侗字仁謹煬帝孫元德太子三子美姿儀性寬厚大業二年  
立爲越王帝每巡幸侗常留守東都楊元感反與民部尙書樊  
子蓋拒之事平朝於高陽拜高陽太守俄似本官留守東都十  
三年煬帝幸江都復令侗與金紫光祿大夫段達太府卿元文  
都攝民部尙書韋津右武衛將軍皇甫無逸等總留臺事宇文

化及之弑逆也文都等議以侗元德太子之子屬最爲近於是  
乃共尊立大赦改元曰皇泰諡帝曰明廟號世祖追尊元德太  
子爲孝成皇帝廟號世宗尊其母劉良娣爲皇太后以段達爲  
納言右翊衛大將軍攝禮部尙書王世充亦納言左翊衛大將  
軍攝吏部尙書元文都內史令左驍衛大將軍盧楚亦內史令  
皇甫無逸兵部尙書右武衛大將軍郭文懿內史侍郎趙長文  
黃門侍郎委以機務爲金書鐵券藏之宮掖於時雒陽稱段達  
等爲七貴未幾字文化及立秦王子浩爲天子來次彭城所經  
城邑多從逆黨侗懼遣使者蓋琮馬公政招懷李密密遂請降  
侗大悅禮其使甚厚卽拜密爲太尉尙書令魏國公令拒化及

密大悅北面拜伏臣禮甚恭遂東拒化及七貴頗不協陰有相圖之計未幾元文都盧逸郭文懿趙長文等爲世充所殺皇甫無逸遁歸長安世充詣侗所陳謝辭情哀苦侗以爲至誠命之上殿被髮爲盟誓無二志自是侗無所關預侗心不能平遂與記室陸士季謀圖世充事不果而止及世充破李密衆望益歸之遂自爲鄭王總百揆加九錫備法物侗不能禁段達雲定興等十人入見侗曰天命不常鄭王功德甚盛願陛下遵唐虞之迹侗怒曰天下者高祖之天下東都者世祖之東都若隋德未衰此言不可發必天命有改亦何論於禪讓公等或先朝舊臣績宣上代或勤王立節身服軒冕忽有斯言朕復當何所望

神色凜然侍衛者莫不流汗既而退朝對良娣而泣世充更使人謂侗曰今海內未定須德長君待四方又安復子明辟必若前盟義不違負侗不得已遜位於世充遂被幽居於含涼殿世充僭偽號封潞國公月餘宇文儒童裴仁基等謀誅世充復尊立侗事泄並見害世充兄世惲因勸世充害侗以絕民望世充遣其姪行本齎鴆詣侗所曰願皇帝飲此酒侗知不免請與母相見不許遂布席焚香禮佛呪曰從今以去願不生帝王尊貴之家於是仰藥不能時絕更以帛縊之世充偽諡爲恭皇帝

楊暕

楊暕煬帝次子字世肫小字阿孩美容儀疎眉目少爲文帝所

愛開皇中立爲豫章王及長頗涉經史尤工騎射初爲內史令  
仁壽中拜揚州總管泝淮以南諸軍事煬帝卽位進封齊王大  
業二年帝初入東都盛陳鹵簿陳爲軍導尋轉豫州牧俄而元  
德太子薨朝野注望咸以暕當嗣帝又勅史部尙書牛宏妙選  
官屬公卿由是多進子弟明年轉豫州牧尋徙河南尹開府儀  
同三司元德太子左右二萬餘人悉隸於暕寵遇益隆自樂平  
公主及諸戚屬競來致禮百官稱謁塹咽道路暕頗驕恣昵近  
小人所行多不法遣喬令則劉虔安裴該皇甫謀庫狄仲綺陳  
智偉等采求聲色狗馬令則等因此放縱訪民家有女者輒矯  
暕命呼之載入暕宅因緣藏隱恣行淫穢而後遣之仲綺智偉

二人詣隴西槁炙諸胡責其名馬得數匹以進於暕暕令還主  
仲綺等詐言王賜將歸於家暕不之知也又樂平公主嘗奏帝  
言柳氏女美者帝未有所答久之主復以柳氏進於暕暕納之  
後帝問主柳氏女所在主曰在齊王所帝不悅暕於東都營第  
大門無故而崩廳事楹中折識者以爲不祥後從帝幸榆林暕  
督後軍步騎五萬恆與帝相去數十里而舍會帝於汾陽宮大  
獵詔暕以千騎入圍暕大獲麋鹿以獻而帝未有得也從官皆  
言爲暕左右所遏獸不得前帝於是發怒求暕罪失時制縣令  
無故不得出境有伊闕令皇甫翊幸於暕違禁將之汾陽宮又  
京兆人達奚通有妾王氏善歌貴遊宴聚多或要致於是展轉



亦出入王家御史韋德裕希旨劾暕帝令甲士千餘大索暕弟  
因窮治其事暕妃韋氏者戶部尙書冲之女也早卒暕遂與妃  
姊元氏婦通產一女外人皆不得知陰引喬令則於弟內酣宴  
令則稱慶脫暕帽以爲歡樂召相工令徧視後庭相工指妃姊  
曰此產子者當爲皇后王貴不可言時國無儲副暕自謂次當  
得立又以元德太子有三子內常不安陰挾左道爲厭勝之事  
至是事皆發帝大怒斬令則等數人妃姊賜死暕府寮皆斥之  
邊遠時趙王杲猶在孩孺帝謂侍臣曰朕唯有暕一子不然者  
當肆諸市朝以明國憲也暕自是恩寵日衰雖爲京尹不復關  
預時政帝恆令武賁郎將一人監其府事暕有微失武賁輒奏

之帝亦常慮竦生變所給左右皆以老弱備員而已竦每懷危懼心不自安又帝在江都宮元會竦具法服將朝無故有血從裳中而下又坐齋中見羣鼠數十至前而死視皆無頭竦意甚惡之俄而化及作亂矣將犯蹕帝聞之顧謂蕭后曰得非阿孩邪其見疏忌如此化及復令人捕竦竦尙臥未起賊旣進竦驚曰是何人莫有報者竦猶謂帝令捕之因曰詔使且緩兒不負國家賊於是曳至街而斬之及其二子亦遇害竦竟不知殺者爲誰時年三十四有遺腹子政道與蕭后同入突厥處羅可汗號爲隋王中國人歿入北蕃者悉配之以爲部落以定襄城處之突厥滅乃歸于唐

楊瓚

楊瓚字恆生一名慧文帝母弟也周世以父忠軍功封竟陵郡公尚武帝妹順陽公主保定四年累遷納言授儀同瓚貴公子又尚公主美姿儀好書愛士甚有令名於當世時人號曰楊三郎武帝甚親愛之平齊之役諸王咸從留瓚居守帝謂之曰六府事殷一以相付朕將遂事東方無西顧之憂矣其見親信如此宣帝卽位遷吏部中大夫加上儀同未幾帝崩文帝入禁中將總朝政令廢太子勇召之欲有計議瓚素與文帝不協聞召不從曰作隋國公恐不能保何乃更爲族滅事邪文帝作相遷大將軍尋拜大宗伯典修禮律進位上柱國邵國公瓚見文帝

執政羣情未一恐爲家禍陰有圖文帝之計文帝每優容之及受禪立爲滕王拜雍州牧帝數與同坐呼爲阿三後坐事去牧以王就第瓚妃字文氏先時與獨孤皇后不平及此鬱鬱不得志陰有呪詛帝命瓚出之瓚不忍離絕固請帝不得已從之宇文氏竟除屬籍瓚由是忤旨恩禮更薄開皇十一年從幸栗園暴薨時年四十二人皆以爲遇鳩子綸嗣

### 楊爽

楊爽字師仁小字明達文帝異母弟也周世在襁褓中以父忠軍功封同安郡公六歲而孤爲獻后所鞠養由是文帝於諸弟中特寵愛之十七爲內史上士文帝執政拜大將軍泰州總管

未之官轉授蒲州刺史進位柱國及受禪立爲衛王尋遷雍州  
牧領左右將軍俄遷右領軍大將軍權領并州總管歲餘進位  
上柱國轉涼州總管爽美風儀有器局治甚有聲其年以爽爲  
行軍元帥步騎七萬以備胡出平涼無虜而還明年大舉北伐  
又爲元帥河間王宏豆盧勣竇榮定高頴虞慶則等分道而進  
俱受爽節度爽親率李元節等四將出朔州遇沙鉢略可汗於  
白道接戰大破之擄獲千餘人驅馬牛羊鉅萬沙鉢略可汗中  
重瘡而遁文帝大悅賜爽眞食梁安縣千戶六年復爲元帥步  
騎十五萬出合川突厥遁逃而返明年徵爲納言文帝甚重之  
未幾爽寢疾上使巫者薛榮宗視之云衆鬼爲厲爽令左右驅

逐之居數日有鬼物來擊榮宗榮宗走下階而斃其夜爽薨時年二十五贈太尉冀州刺史子集嗣

### 楊智積

楊智積文帝弟整之子也襲封蔡王母妃尉遲剛女開皇中將葬妃有司奏聞文帝曰昔幾殺我我有同生二弟並倚婦家勢常憎疾我我向咲之云爾既嗔我不可與爾角嗔並云阿兄止倚頭額時有醫師邊隱逐勢言我後百日當病癩二弟私喜以告父母父母泣謂我曰爾二弟大劇不能愛兄我因言一日有天下當改其姓夫不愛其親而愛他人者謂之悖德當改之爲悖父母許我此言父母亡後二弟及婦又讒我言於晉公于時

每還欲入門嘗不喜如見獄門託以患氣常鎖閣靜坐唯食至時暫開閣每飛言入耳竊云復未邪當時實不可耐羨人無兄弟世間貧家兄弟多相愛由相假藉達官兄弟多相憎爭名利故也尋拜開府儀同三司授同州刺史儀衛資送甚厚智積在州未嘗嬉戲游獵聽政之暇端坐讀書門無私謁有侍讀公孫尚儀山東儒士府佐楊君英蕭德言並有文學時延於座所設唯餅果酒纔三酌家有女妓唯年節嘉慶奏於太妃之前其簡靜如此昔文帝龍潛時景王與帝不睦其太妃尉氏又與獨孤后不相諧以是智積常懷危懼每自貶損文帝知其若是亦哀憐之人或勸智積治產業者智積曰昔平原露朽財帛苦其多

也吾幸無可露何更營乎有五男止教讀論語孝經而已亦不  
令交通賓客或問其故智積答曰卿非知我者其意恐兒子有  
才能以致禍也開皇二十年徵還京第無他職任闔門自守非  
朝覲不出煬帝卽位滕王綸衛王集並以讒構得罪智積弟高  
陽公智明亦以交遊奪爵智積愈懼大業七年授宏農太守委  
政寮佐清淨自居及楊元感作亂自東都引軍而西智積謂官  
屬曰元感聞大軍將至欲西圖關中若成其計則根本固矣當  
以計縻之使不得進不出一旬自可擒耳及元感軍至城下智  
積登陴詈辱之元感怒甚留攻之城門爲賊所燒智積乃更益  
火賊不得入數日宇文述等援軍至合擊破之十二年從駕江



都寢疾帝時疎薄骨肉智積每不自安及遇患不呼醫臨終謂所親曰吾今日始知得保首領沒於地矣時人哀之有子道元

### 楊慶

楊慶宏子傾曲善候時變煬帝時猜忌骨肉滕王綸等皆被廢放唯慶獲全累遷滎陽太守頗有治績及李密據洛口倉滎陽諸縣多應密慶勒兵拒守歲餘城中糧盡兵勢日蹙密因遺慶書曰自昏狂嗣位多厯歲年剝削生民塗炭天下璿室瑤臺之麗未極驕奢糟邱酒池之荒非爲淫亂今者共舉義旗勦剪兇虐八方同德萬里俱來莫不期入關以亡秦爭渡河而滅紂東窮海岱南泊江淮凡厥遺人承風慕義唯滎陽一郡王獨守迷

夫微子紂之元兄族實爲重項伯籍之季父戚乃非疎然猶去  
朝歌而入周背西楚而歸漢豈不眷戀宗祊留連骨肉但識寶  
鼎之將移知神器之先改而王之先代家住山東本姓郭氏乃  
非楊族止爲宿於隋朝先有勳舊遂得預霑磐石名在葭莩婁  
敬之與漢高殊非血胤呂布之與董卓良異天親芝焚蕙歎事  
不同此又王之昏主心若豺狼讐忿同胞有逾沉闕惟勇及諒  
咸罄旬師况乃族類爲非何能自保爲王計者莫若舉城從義  
開門送款安若泰山高枕而臥長守富貴足爲美談乃至子孫  
必有餘慶今王世充屢被摧蹙自救無聊偷存晷漏詎能支久  
段達韋津東都自固何暇圖人世充朝亡達便夕滅又江都荒

緬流宕忘歸內外崩離人神怨憤上江米船皆被抄截士卒饑餒半菽不充事切析骸義均煑弩舉烽火於驪山諸侯莫至浮膠船於漢水還日未期王獨守孤城絕援千里餼糧之計僅有月餘弊卒之多纔盈數百有何恃賴欲相拒抗求枯魚於市肆卽事非虛因歸雁以運糧竟知何日然城中豪傑王之腹心思殺長吏將爲內啓正恐禍生七首疊發蕭牆空以七尺之軀懸賞千金之購可爲寒心可爲酸鼻者也幸能三思自求多福於時江都敗問亦至慶得書遂降於密改姓爲郭氏密破復歸東都更爲楊氏越王侗不之責也及侗稱制拜宗正卿世充將篡慶首爲勸進世充旣僭僞號降爵郇國公慶復爲郭氏世充以

兄女妻之署榮州刺史及世充將敗慶欲將妻回歸長安其妻謂之曰國家以妾奉箕箒於公者欲以申厚意結公心耳今叔父窮迫家國阽危而公不顧婚姻孤負付屬爲全身之計非妾所能責公也妾若至長安則公家一婢耳何用妾爲願得送還東都君之惠也慶不許其妻遂沐浴靚粧仰藥而死慶歸夫唐爲宜州刺史郇國公復姓楊氏其嫡母元太妃年老兩目失明王世充以慶叛已而斬之

### 楊子崇

楊子崇文帝族弟也父益生贈荊州刺史子崇少好學涉獵書記有風儀好賢愛士開皇初拜儀同以車騎將軍典宿衛後爲

司馬侍郎煬帝嗣位累遷侯衛將軍坐事免未幾復令檢校將  
軍事從侯幸汾陽宮子崇知突厥必爲寇患屢請早還京師帝  
不納尋有雁門之圍及賊退帝怒之曰子崇怯懦妄有陳請驚  
動我衆心不可居爪牙之寄出爲離石郡太守治有能名自是  
突厥屢寇邊塞胡賊劉六兒復擁衆劫掠郡境子崇上表請兵  
鎮遏帝復大怒下書令子崇巡行長城子崇出百餘里四面路  
絕不得進而時歸百姓饑饉相聚爲盜子崇前後捕斬數千人  
歲餘朔方梁師都馬邑劉武周等各種兵作亂郡中諸胡復相  
嘯聚子崇患之言欲朝集遂與心腹數百人自孟門關將還京  
師遇道路隔絕子崇退歸離石所將左右旣聞太原兵起不復

入城遂各叛去子崇悉收叛者父兄斬之後數日義兵至城中  
應之城陷爲讐家所殺